


# Krax Im Ju Kawn Khrit



**Krax im ju kawn khrit**

## KRAX IM JU KAWN KHRIT

### KAING: LAI

| <u>Simin</u> | <u>Grawhgrawng</u>                     | <u>Pakngai lai</u> |
|--------------|----------------------------------------|--------------------|
|              | Lox nawb cao tiem lai                  | (i)                |
| 1.           | Krax im ju kawn pwi piang haktiex      | 1                  |
| 2.           | Pa tang siyox kawn khrit               | 5                  |
| 3.           | Krax im ju pa singax singeh            | 9                  |
| 4.           | Kaux rhawm ka hoik pon tix krax taoh   | 13                 |
| 5.           | Kham sakse Yesux                       | 17                 |
| 6.           | Sawg taoh khwan khaing daux phimap     | 20                 |
| 7.           | Krax pa appong ka Siyiex               | 23                 |
| 8.           | Coca hawt yuh alo Siyiex               | 26                 |
| 9.           | Im ju daux krax rawgbwan               | 29                 |
| 10.          | Beeh glawm son kawn khrit              | 33                 |
| 11.          | Kawn khrit hoik pex kheu Cao Khrit     | 36                 |
| 12.          | Via hu khaing pa caox pa caig          | 40                 |
| 13.          | Krax tieh krax feen                    | 44                 |
| 14.          | Kawn khrit mai kaing krub              | 48                 |
| 15.          | Kawn khrit mawh cao priex sin Siyiex   | 53                 |
| 16.          | Riangrao pa pon kham pon geu           | 57                 |
| 17.          | Kawn khrit mai krax kwang plak haktiex | 59                 |
| 18.          | Nyiexma kawn khrit                     | 62                 |
| 19.          | Kawn khrit yuh paoxpie tau             | 66                 |
| 20.          | Kawn khrit yaogyaw bwanson             | 68                 |
| 21.          | Kawn khrit mai Gumlox Siyiex           | 71                 |
| 22.          | Cao teem pa mawh Khwan Singax Singeh   | 74                 |



## LOX NAWB CAO TIEM LAI

Khiox khaw ka ex kadaux ceu kaux Yesux Khrit heue. Kheu bwanson Siyiex, tokaux aux pon ti lawd luan khaing krax saux krax yum, mai deeh pon pa im ju daux kaing jhaw Siyiex tau mai can tax yiex miex keeing, puxaik puxo, pa ot dudah kudee heue.

Mawh kheu pa koe alo Siyiex ka ex, khaix baox hoik pon tiem pon yuh phuk lai iak, pa teei riang rao plak khwan, tix ceu hoik tix ceu, yamin, aux baox pon akhwang ti baox tiem lai, mai yuh phuk lai pa kok ceukaux, **KRAX IM JU KAWN KHRIT** heue. Aux kiied yaogyaw bwanson Siyiex, mai ting bwanson ka cao pa teem ka aux plak kuceu, sonsang pon yuh lih ka phuk lai in, tom sidah hoik, pa mawh Sara ting Duane mai Sara ting Aron Shwe heue.

Kheu aux keud lai in mawh pa koe bwanson, son kaing jhaw Siyiex tix daog tix dawn, aux tom coca ti tiem kadaux pa ang grum naog heue. Lai in, ang mawh pa toe aux ti thut khaing lai pwi tang kaux, mawh pa rawg aux bwan, ti kieh Khwan Singax Singeh Cao, thong gau ka aux heue. Mawh kheu nan, phan yaox dee lud tix ceu ceu, rom ti teem cox phat liak.

Aux rawg bwan, son can paox pa rom ti yuh kaing khankix, mai son can puxaik puxo daux Cao Khrit pa ot kudah ku dee heue. Baox kieh Siyiex nawb bwan ka piang ex, can pwi pa rieb teem, rieb phat, rieb shiao ka phuk lai iak in, kukaux daux pwi liak, ting bwanson heue.

Daux krax chaoxrhawm Siyiex

Rev. Ngox Khun Pen

Khix 1, 2010 Num

(ii)

## 1. KRAX IM JU KAWN PWI PIANG HAKTIEX

Can kawn pwi piang haktiex in khawmuik khawni leeing, hoik awm nyo sinie, vai ti hoek ot piang haktiex in tivud ticu khaing heue. Mawh kheu phimap, kawn pwi piang haktiex uik, pon ti hoek krax saux krax yum heue.

Kawn pwi mawh pa chix saux chix laux, mai chix yum chix grai khawmuik heue. Vai ti im piang haktiex, mai mawh nyo sinie haktiex in heue. Phuk lai Sigang Khri Siyiex tiem ti deuh ah nin, Ngawh riang phimap mawh krax yum heue. (Romax 6:23).

Ju phaoka dixdix, kawn pwi piang haktiex in, kiied sidaing lang ju heue. Khaix hoik ting phimap kawn pwi sipie sipie, krax pa lud pa loe, mai krax pa caox pa caig, niied ti ting haohhun ka piang haktiex in heue. Mawh kheu kawn pwi tuktiak ka alo Siyiex, mai hawt yuh alo nexnham, sonsang grumnaog alo tokaux tix heue. Alo phimap kuceu, niied ti kheem gut ka haktiex, mai kawn pwi pa ot daux phimap haktiex, ot sipie, ngoing ju sipie heue. Ju kawn pwi mai krax ot krax koe kawn pwi piang haktiex in, niied ti laux hu, lheu khaing tix singaix hoik tix singaix heue. Khaix an krax ot krax koe kawn pwi, niied ti rau hu sinyek sinyek heue. Sonsang lawdluan kawn pwi khaing phimap phigrham haktiex, ang koe cao pa taoh pa lawd tix kaux kawx, pon ang doh koe tete heue. Riengrao kawn pwi, mai can ceu pa koe khawmuik khawm leeing, ang chix kieh kawn pwi luan khaing phimap heue. Sonsang lawdluan kawn pwi khaing phimap, mai khaing meung yum, Siyiex kiied moh ka haktiex sigrien sigre, Nawh

Cao tawx kawn tix pa koe tix kaux khaing, pa mawh Cao Taoh Simiang Yesux Khrit, lih hoek ti kham geu ti yum piang khaoxlhak, son phimap kawn pwi uik heue. Can pwi pa yumrhawm ka Nawh Cao khankix, ang lai hoek krax laux krax leeing, pon lawdluan khaing phimap, mai pon ju leeing ju leeing phan heue.

Can pwi pa yumrhawm ka kawn Siyiex pa mawh Cao Taoh Yesux Khrit an, mawh pa hoik laug Siyiex ka kix heue. Siyiex laug ka pwi yumrhawm, sonsang jhan pa riieng tix, sivoengai kawn pwi piang haktiex in heue. Kawn Khrit mawh pa riieng sinax pa faik ka piang haktiex in heue. Krax im ju kawn pwi piang haktiex in, caox angah, mhawm angah, koe ka daux tawm taix Siyiex khawmuik heue. Riangrao kawn pwi piang haktiex in khawmuik, ang chix kaux cong, mawh pa chix laux chix som heue. Krax tawng krax yung kawn pwi haktiex, mawh pa giex pa going, pa nai pa nawk sivoengai Siyiex heue.

📖 *Kawn pwi ang tawng ka bawgyam cie tix, awm kax pa krix ka rub, mai awm sim pa krix ka jhawk, kawn pwi ang tien tawng ka yam krix tix ka jhawk, pa taung pa caox pa caig ka piang kix heue. (Tawx Cuyi 9:12)*

Krax im ju can kawn pwi piang haktiex in, daux Phuk lai Sigang Khri Siyiex, hoik krai kieh ex tawng awm pa tiem ti deuh tin plak greem khankix heue.

1) Krax im ju kawn pwi haktiex khawmuik, awm pwi hu krax tix kaux heue. Krax hu kawn pwi haktiex an, ang chix sidah tom hock daux ju khaix heue.

- 2) Krax im ju kawn pwi khawmuik, awm ngie camaox khaix laig it tix. (Yaogyaw 13:20)
- 3) Krax im ju kawn pwi haktiex khawmuik, awm veei lih hoek tivud ngie khaing, mai deeh grai hu khaix . (Tawx Cuyi 6:12)
- 4) Krax im ju kawn pwi khawmuik, awm simhawk tivud ngie, mai deeh grai khaix . (Yakop 4:14)
- 5) Krax im ju kawn pwi khawmuik, awm lox lao been, mawh pa ang chix kriem ang chix sidawng heue. (Yaogyaw 90: 9)
- 6) Krax im ju kawn pwi khawmuik, awm rawm pa kreh piang tiex, rurie tivud, deeh hit khaix heue. ( 2 Samoelax 14:14)
- 7) Krax im ju kawn pwi haktiex khawmuik, awm pruh tai rib tai riem, tivud ticu ngie heue ( Yawbax 14:1-2)

📖 *Pwi tix kaux kawx, ang tawng ka ceu pa sang lih ti mawh heue. Mawh mawx pa pon krai nawh mhong ceu pa taksang lih ti mawh khaix nawh lie? ( Tawx Cuyi 10:14)*

Krax im ju kawn pwi, mai can ceu pa koe kuceu kucawng khawmuik khawmleeing, koe ka daux tawm taix Siyiex Tix kaux ngie khaing heue. Can kawn Siyiex kukaux daux pwi, ot ka daux Siyiex, mai chix im ju hawt alo Siyiex heue. Phan mawh kawn pwi haktiex, pa ang yumrhawm ka Siyiex khankix, ot kadaux phimap, mai kix yuh alo phicaox phicaig, tau mai alo nexnham kawn pwi heue. (1 Yohan 5:19)

Can pwi yumrhawm kukaux, ang lai chix awm kawn haktiex khankix heue. Kawn Siyiex mawh pa hoik luan hu khaing phimap phighram, mai pa hoik hoek krax rah krax see ka daux Siyiex kheu krax yumrhawm heue. Phan mawh kawn pwi haktiex khankix, ang tawng deeh kaoh tix, ang tawng dee ot dee koe tix, ang tawng kaing pa caw ti yuh khankix, ang tawng dee sang hoek sang hu tix, mai ang tawng dee bleeh dee blaung krax im ju kix heue.

Viang kawn pwi haktiex khawmuik, ang lai pon ti tawng krax im ju tokaux tix kawx, Simiang Siyiex hoik tawng can krax im ju kawn pwi uik, mai can ceu pa lih ti mawh kuceu kucawng khawmuik khawmleeing heue. Krax im ju kawn pwi uik, mawh pa koe greem taix Siyiex pa ting siawpsibrawm, piang kuceu khawmuik heue. Phan ang mawh kadaux Siyiex, mai phan ang mawh kheu pa cox khre Siyiex, kawn pwi ang koe bwanson tidtix heue. Krax im ju kawn pwi, mai pa lih mawh kadaux krax pa im ju kawn pwi kuceu khawmuik, mawh ceu pa lih ti mawh greem taix Siyiex pa ting siawp-sibrawm piang khawmmu khawmmiang heue.

📖 *Mawh kheu kiied haokhuan, kawn pwi sang koe bwanson ka ceu pa tix lie? ( Tawx Cuyi 6:11 )*

\*\*\*\*\*

## 2. PA TANG SIYOX KAWN KHRIT

Kawn Khrit tang siyox khaing pwi haktiex heue. Krax im ju kawn Khrit, mai krax im ju kawn haktiex, ang doh chix awm paox tix tibawg kawx heue. Grawhgrawng nawh, kheu krax pa yumrhawm mai pa deuh ex rhawm tix ka Siyiex im ju, ang khaw caw paox tix, mai ang awm paox tix heue. Can pwi pa yumrhawm ka Siyiex kukaux, chix hawt yuh pa khaw rhawm Siyiex, can pwi pa ang yumrhawm ka Siyiex khankix yuh alo nexnham, mai yuh alo tokaux tix heue. Mawh kheu nan, kiex ang chix awm paox tix kheu jao an heue.

Can kawn Khrit khankix, mawh pa hoik appong tokaux tix mai khwan ju tix khawmuik ka daux tawm taix Siyiex pa im ju heue. Kheu hoik koe krax im ju kix daux tawm taix Siyiex, kix ang lai yuh alo tokaux cao tix, kix ang lai mawh cie tokaux cao tix, kix hoik mawh cie Siyiex, mai son Siyiex khawmuik khawm leeing heue. Mawh kheu kix hoik mawh cie Siyiex khawmuik, kix ang lai im ju son tokaux tix, kix chix im daux pa koe alo Siyiex ku jheeng jheeng heue.

Phan mawh kawn haktiex, pa ang yumrhawm ka Siyiex krax im ju kix ang koe dee deuh rhawm tix pa kaux cong, kix chix yuh ngie alo nex nham tokaux tix ngie, dee sidah ju kix, ang koe pa kaux rhawm ang koe pa keud pot jun pot tix ceu kawx. Phan mawh kawn khrit pwi yumrhawm kukaux, tom yam kawn im ju ex piang haktiex in yamin kawx, ex hoik pon ceu pa kaux rhawm pa fahrhawm tix tete, yam lih hu khaing haktiex in tix ngaix sax, ex koe krax keud pot jun pot pa

kriem, pa kaux pa cong heue. In khankix, mawh pa tang siyox kawn khrit khaing kawn haktiex heue.

Kawn pwi haktiex khawmuik, chix saux chix ngia, chix laux chix som, chix yum chix grai, chix kharhawm kharhi awm paox tix heue. Awm an ex kawn Siyiex pwi yumrhawm khankix, ex kaw chix saux chix ngia, chix kha chix som, chix yum chix grai, chix kharhawm kharhi tix awm kawn haktiex kix heue. Viang mawh kawx nan, pa ang doh chix awm paox tix tibawg kawx, mawh pa hoik luan ex khaing phimap mai pa hoik lih mawh ex kawn Siyiex tete heue. Mawh pa koe dee keud pot krox jun ex ka son ju khaix, jah tom yam kawn im ju ex piang haktiex yamin heue. Inkix mawh pa ang doh chix awm paox tix tibawg kawx heue. Kawn Siyiex khankix, ang lai ot kadaux pa seeing pa brai, ang lai ot kadaux pa klawm kraung cien, ang lai ot kadaux pa faik pa duk, ang lai ot kadaux pa yuh alo nexnham, ang lai ot kadaux pa lhat pa graung ka phicaux phicaig, ang lai ot kadaux pa ang cu ang ngiet ka Siyiex im ju, ang lai ot kadaux pa ang keud ang ce, ang lai ot kadaux pa ang koe dee keud pot krox jun, ot kadaux pa gauxrhawm ti yuh alo Siyiex ang jud ang jai, mai pa im ju ka son Siyiex, mai kadaux Siyiex heue. Siyiex ah nin ka pwi yumrhawm khawmuik.

📖 *Kieh pa riieng pex jhan riieng sivoie kawn pwi heue. Yuh ka mawx, sonsang yaax kix kaing yuh pex pa mhawm, mai yaogyaw keeing pex pa ot kadaux meung raoma ( Mathiex 5:16)*

Kawn khrit khankix, mawh pa riieng pa toh riieng sinax pa faik, ka piang haktiex in heue. Pa ah nan, ang mawh sang yaw sang yaog ex ka min plakngai kawn khrit khankix, mawh sonsang tawng kawn khrit ka tokaux tix, mai sonsang tawng kawn khrit ngawh jum pa ting, pa hoik tawx Siyiex ka tix heue. Siyiex pa im ju, laug ti teei mai ciak ti deuh ka kawn khrit pwi yumrhawm khawmuik, mai tawx ngawh jum pa ting pa lhaong khaing ngawh jum tang ceu ka ex, awm pa hoik tiem ti deuh daux Phuk lai Sigang Khrit awm in plak greem heue.

📖 *Pex mawh ceu pwi pa hoik laug, pa mawh cao giex kaing li Simiang, pa mawh ceu pwi pa singax singeh, pa mawh pwi Siyiex tete, yuh ka mawx sonsang jhi ka grawhgrawng ceu pa ting pa mhawm, Cao pa hoik kok pex lih khaing daux pa faik, mai laig ka daux pa riieng pa daox pa deng cie Tix heue. (1 Petrux 2:9-10)*

Phan kawn khrit khankix, ang nyang tang siyox khaing kawn haktiex in, pa laug Siyiex ti teei, mai ciak Siyiex ti deuh ka kawn khrit khankix, ang nyang koe dee bleeh, mai ang nyang toh pa riieng, sinax paox pwi piang haktiex heue. Siyiex laug ti teei koe kawn khrit, sonsang toh riieng mhawm griang nong nong ang lai mawh, laug ti teei sonsang koe bwanson son haktiex, mai son ju khaix, daux meung raoma heue. Yam im ju ex ka piang haktiex in, khaw ti lhat graung, nabyam yungyi, mai krub ka Siyiex pa im ju, daux pa kaux sijax, tom sidah ju tix heue. Grawhgrawng nawh, hoik tiem ti deuh daux Phuk lai Sigang Khrit tix dah ah nin,

📖 Mawh kheu hoik pon ex meung pa ang chix yung yiang kah, kieh ex koe bwanson, sonsang chix ex ti yuh kaing krub pa khaw pa caw ka rhawm Siyiex, ka krax pa chix yung chix yi heue. Grawnghrawing nawh, Siyiex ex mawh ngu pa gleeing heue. (Hebrie 12: 28-29)

\*\*\*\*\*

### 3. KRAX IM JU PA SINGAX SINGEH

Siyiex pa im ju, mawh Siyiex pa Singax Singeh, pa rah pa see heue. Can pwi pa krub ka Siyiex pa im ju kukaux daux pwi, caw ti krub ka Nawh kadaux pa singax singeh, mai kadaux pa rah pa see heue. Mawh kheu gumlox Phuk lai Singang Khri hoik tiem ti deuh ah nin,

📖 Viang mawh kawx nan, awm singax singeh Kaw pa hoik kok pex, kieh tokaux pex singax singeh yuh nan, ka daux kaing pa yuh tix khawmuik heue. Mawh kheu hoik tiem ti deuh ah nin, kieh tokaux pex signax singeh, kheu singax singeh Aux heue. (1 Petrux 1:15-16)

Kawn khrit ang lai chix singax kheu jhawm mhawm pa yuh cao tix, ang chix singax kheu pa coca ti yuh krax tan krax lu, ang chix singax kheu pa yuh ceu pa mhawm ka riangrao cao tix, ang chix singax kheu pa comrawm, ang chix singax kheu pa ih pwie cao, ang chix singax kheu pa yuh kawn pwi ti ceu kawx heue. Pa chix kieh kawn pwi singax singeh, mawh Siyiex Cao pa grum naog, mai Cao pa Singax Singeh tix kaux khaing pa chix kieh kawn pwi singax kah heue.

#### Pa chix kieh kawn pwi singax

1. Pa chix kieh kawn pwi singax mawh pa yumrhawm mai hawt ti yuh alo Siyiex pa im ju leeing ju heue. (Yohan 6:39-40, Makux 3:35)
2. Pa chix kieh kawn pwi singax, mawh gumlox Siyiex pa koe daux Phuk lai Sigang Khri, pa cu nghiet pa hawt yuh mai pa im ju daux gumlox an heue. (Yohan 17: 16-19)

3. Pa chix kieh kawn pwi singax, mawh pa hoik yumrhawm grawng pa kham geu Yesux son phimap kawn pwi, nham pa singax Yesux khrit an, tom sigrhah ti tik ka phimap kawn pwi pa yumrhawm ka Nawh Cao, mai kaw an, tom pon lih mawh pa singax singeh, kheu nham Cao Khrit, Siyiex pa singax tom tawx akhwang pa mawh kaw an kawn Tix, mai tawx sin ju leeing ju ka kaw an, mai tawx sin meung raoma ka nawh heue. (1 Petrux 1:19-20; 1 Yohan 1:7; Plak Jhi 1:5).
4. Pa chix kieh kawn pwi singax, mawh pa mhong loxbwan Siyiex, pa mawh loxbwan gauxrhawm gauxrhi, mai yumrhawm kah tete telai, mai ang lai koe rhawm ra mu, im ju ka daux Cao Khrit tix kaux khaing heue. (Yaogyaw 119:130)

Kawn khrit tibliah koe pa lud keud yuh nin, phan hoik mawh khrityan tix kaux, ex tom pon krax taoh, mai pon pa singax singeh, ah nawh nan heue Phan keud plak piang ngie khaing, rug mawh tete telai heue. Viang mawh kawx nan, phan ang koe krax yumrhawm, phan ang koe krax rieb teei ka Yesux mawh Cao Taoh tix, phan ang appong khwan ju tokaux tix khawmuik daux tawm taix Siyiex, phan ang im ju ka daux alo Siyiex, ang chix pon krax taoh kheu pa teei pa ceep ceu kaux khrityan ngie, mai ang yumrhawm ka Yesux heue. Khrityan ang chix kieh kawn pwi pon krax taoh, mawh pa yumrhawm ka Cao Khrit mai pa lih mawh khrityan ngie khaing, pa chix pon krax taoh heue. Khaix an tom chix lih koe pa singax singeh mai pa rah pa see daux krax im ju tix heue.

Pwi mawx angah, phan ang nyang yumrhawm ka Yesux mawh kawn Siyiex Cao Taoh, mai phan nawh ang nyang im ju daux gumlox Siyiex pa Singax Singeh ku singaix, ang nyang pon krax im ju pa singax singeh heue. Krax im ju kawn khrit mawh krax im ju pa singax singeh pa ah nan, ang doh nieb mawh pa yaog lhaong jhaong ting ka kawn khrit giex giex going going, mai ang lai doh mawh pa yaw min plakngai kawn khrit sinax pwi haktiex giex giex going going, mai ang lai mawh pa yeen pa ne ka pwi haktiex in tix kaux kawx, tix bawg kawx, mawh pa kieh kawn khrit tawng tokaux tix tom khaw caw, mai mawh pa simie ti kieh pwi haktiex khawmuik, yumrhawm ka Siyiex pa Singax Singeh heue.

📖 *Mawh kheu nan, pex tak grum mhawm, awm grum mhawm Keeing pex pa ot daux meung raoma.*  
(*Mathiex 5:48*)

#### Singax kheu patix?

1. Singax kheu gumlox tawm jhawm krai Siyiex (Yohan 17:7)
2. Singax kheu nham Yesux Khrit (Hebrie 9:12-15)
3. Singax kheu mhong, mai cunghiet ka lox sidiex, loxbwan gauxrhawm gauxrhi (Hebrie 12:10-11)
4. Singax kheu appong tix khawmuik daux taix Siyiex (Romax 6:19)
5. Singax kheu pa chix priex chix rien tokaux tix, mai rhawm tix, mai ju khwan tix, daux alo Siyiex heue. (2 Kawrinthux 7:11)

Krax im ju pa singax

1. Ang koe rhawm ra mu ka Siyiex pa im ju.
2. Ang kieh tang ceu ting khaing Siyiex.
3. Ang yuh meeig yuh miang
4. Ang tawx priex pwi pa hoik yum
5. Ang yuh simeet yuh sat
6. Ang tawx sibawg, ang chawx jhai, ang jhak lai taix.
7. Ang kok khwan
8. Ang eei ti cie singie, ang eei kluan
9. Ang yuh taoh mai ang yuh miang
10. Ang lhat ka phicaux
11. Ang lhat ka caomaox caox khaoxcien
12. Ang gauxrhawm daux phimap mai pa seeing pa brai.
13. Ang krub ang deuh riang rao daux nyiex tix.
14. Ang lai lhat ka singie, sijax heue.
15. Ang lai jhak singaix sawm.

Pa hoik sawn tokaux tix mawh kawn khrit, mai ca kawn ot kadaux been pa seeing pa brai ankix, kawn koe tom nie heue. Ceu pa yuh nan, kheu ang nyang yumrhawm ka Siyiex pa singax singeh, krax im ju nawh kawx ang doh chix koe ceu pa singax singeh tibawg kawx heue. Krax im ju kawn khrit, ang lai dex dawd mai can ceu inkix, mawh pa singax singeh, kheu pa im nawh daux Siyiex pa singax singeh heue.

Phat ka daux lai inkix

|                                                                                     |           |                     |
|-------------------------------------------------------------------------------------|-----------|---------------------|
|  | Isayax    | 44:25; 44:10; 47: 9 |
|  | Yezakelax | 20:8                |
|  | Mikha     | 5:12                |
|  | Habakuk   | 2:9                 |

## ❁ 4. KAUX RHAWM KA HOIK PON TIX KRAX TAOH ❁

Can pwi pa een pa sawn tokaux tix mawh kawn khrit kukaux daux pwi, caw ti mawh pwi pa kaux rhawm ka hoik pon tokaux tix krax taoh heue. Pwi mawx angah, pa ang kaux rhawm ka hoik pon tokaux tix krax taoh khankix, mawh pwi pa ang nyang kaux cong krax yumrhawm tete telai heue. Pwi tiblax, teei ceukaux kawn khrit, mai ang yumrhawm ka Cao Khrit, mai ang hawt khaix Cao Khrit, kheu ang nawh nyang bax pon krax yumrhawm, pa kaux rhawm ka hoik pon tokaux tix krax taoh Yesux Khrit heue.

Can pwi yumrhawm ka Yesux Khrit, mai kaux rhawm ka hoik pon tix krax taoh kukaux, caw ti mawh pwi pa cox khre awm can inkix pa jhi ti deuh plak greem tin heue.

1. Nawh mawh pwi pa rieb tokaux tix mawh kawn phimap heue.(Yaogyaw 51:4-5)
2. Nawh tawng tokaux tix ang chix pon luan khaing phimap kheu krax twah krax klaung tokaux tix tix ceu kawx heue.  
(Efesux 2:9)
3. Nawh tawng lo ka cao pa taoh tix khaing phimap mai tawng grawng moh Siyiex ka pwi phimap heue.  
(Romax 5:8)
4. Nawh tawng can pwi pa ang yumrhawm ang chix pon hoek krax taoh heue.(Yohan 3:18; Hebrie 4:6)
5. Nawh lo ti baux deeh keh ra bawg tibawg heue.  
(Yohan 3:5-7)

6. Nawh tieh loh ti mawh pwi khraox daux Cao Khrit heue (2 Kawrinthux 5:17)
7. Nawh hoik mawh pwi pa singax khu nham Yesux Khrit heue. (Hebrie 13:12, 1 Yohan 1:7)
8. Nawh hoik hoek krax rah krax see khu krax yumrhawm heue. (Romax 10:4)
9. Nawh hoik lih mawh kawn praix Siyiex heue. (1 Yohan 3:1-2)
10. Nawh hoik pon sin khu Cao Khrit heue. (Kalatix 4:7; 1 Yohan 5:13)
11. Khu hoik mawh nawh kawn praix Siyiex ang lai chix yuh phimap heue. (1 Yohan 5:18)
12. Nawh chix im ju son ju khaix heue. (Hebrie 12:28)
13. Nawh hoik pon Khwan Singax Singeh mai kham sakse Cao Khrit heue. (Kawncau 1:8; Yohan 3:34)
14. Nawh chix kieh Siyiex koe min plakngai khu tokaux mai rhawm rhi, mai khwan ju tix heue. (Romax 6:20)

**Ceu pa tiebtie son ang sang pon krax taoh**

1. Ang een rhawm ka Siyiex im ju
2. Ang yumrhawm ka gumlox Phuk lai Sigang Khri
3. Ting riang daux alo nexnham, laig it daux alo khwan
4. Ang cu rieb teei Khwan Singax Singeh kwang ka piang krax im ju tix
5. Nie deuh haktiex ting ceu khaing ju khaix
6. Yuh alo tokaux tix ting khaing alo Siyiex
7. Ang rawgbwan mai ang teei riang ka Siyiex  
Ceu in khankix, mawh pa tiebtie ex ang pon hoek ka krax moh Siyiex, mai ka krax taoh Yesux Khrit heue.

**Krax pa kaux rhawm ka hoik pon krax taoh glhawg mawx glhawg an, koe awm pa tiem plak greem tin heue.**

1. Rieb tokaux tix mawh kawn pwi phimap tix kaux (Yaogyaw 51:4-5; Romax 3:10-14)
2. Ang chix pon luan khaing phimap ka riangrao tix ceu kawx (Efesux 2:8)
3. Kiied lo ka Cao taoh tix tete telai (Romax 5:8-9)
4. Mawh Yesux tix kaux khaing pa pon tawx krax taoh (Yohan 3:16-18; Hebrie 4:6)
5. Caw ti baow deeh keh tix bawg heue (Yohan 3:5-7)
6. Tieh loh ti mawh pwi khraox daux Cao Khrit (2 Kawrinthux 5:17)
7. Sigrhah ka daux nham Yesux Khrit (Hebrie 13:12; 1 Yohan 1:7)
8. Hoik pon krax rah see khu krax yumrhawm (Romax 10:4)
9. Pon akhwang ti mawh kawn Siyiex tix kaux (1 Yohan 3:1-2)
10. Pon ti cie sin Siyiex (Kalatix 4:7, 1 Yohan 5:13)
11. Ang lai yuh phimap (1 Yohan 5:18)
12. Im ju son ju khaix son meung raoma (Hebrie 12:28)
13. Pon Khwan Singax Singeh Cao mai kham sakse (Yohan 3:34; 7:38)
14. Chix kieh min plakngai Siyiex lih koe daux krax im ju tix (Romax 6:20)

16 ❀ *Kaux rhawm ka hoik pon tix krax taoh*

15. Yuh kaing jhaw Siyiex mai krax gauxrhawm  
(Yaogyaw 100:2; 118:17)

16. Krox jun ka bawgyam hoek Yesux ra bawg tibawg  
(Mathiex 24:42)

17. Yuh naing ka phicaux Satan (Mathiex 10:7-10)

18. Kaux cong mai kaux sijax tom sidah yum  
(Plak Jhi 2:10; Makux 13:13)

\*\*\*\*\*

5. KHAM SAKSE YESUX

 *Pwi kukaux pa kham ti rieb teei ka Aux plak sivo  
ngai pwi, Aux tak kham ti rieb teei nawh sivo  
ngai Keeing Aux pa ot kadaux meung raoma heue.  
(Mathiex 10:32)*

Krax taoh Yesux mawh son can pwi piang haktiex in khawmuik heue. Siyiex hoik laug ti teei ka pwi yumrahwm khankix, mawh sonsang kham sakse grawng krax moh Siyiex, mai grawng krax taoh Simiang Yesux Khrit heue. Lox tawm Yesux ka kawncau mauso khankix, pex hu ti kham sakse Aux, ah nan heue. Yesux krai ka pwi yumrhawm khawmuik mawh sakse Nawh heue. Phan hoik yumrhawm ka Cao Khrit, tak pon Khwan Singax Singeh, mai tag sang kham mhai sakse grawng Yesux Khrit, jah ka dee ot tix, tom hu ka piang haktiex in kudah kudee heue. In mawh lox tawm jhawm krai Yesux ka can pwi pa yumrahwm khawmuik heue.

1. Kham ti teei Yesux mawh Cao taoh tix sivo ngai pwi
2. Kham grawng ting krax moh Siyiex piang khawmuik
3. Kham sakse mai jhi pwi yaox ceu pa mhawm cie Cao Khrit heue (Mathiex 5:126, 1 Petru 2)
4. Kham sakse grawng pa mhawm Siyiex son pwi khawmuik (Nahum 1:7; Yaogyaw 136:1).

Kham sakse dee mawx lie?

1. Kham sakse dau nyiex bwan heue.
2. Kham sakse dau nyiexma khankix heue.

3. Kham sakse daux dee hu dee hoek tix heue.
4. Kham sakse ka pwi meed pwi tawng tix khawmuik.

Kham sakse mai jhi pwi yaox

1. Jhi pwi yaox been mhawm jhawm tix mai kham sakse
2. Jhi pwi yaox Phuk lai Sigang Khri Siyiex mai kham sakse
3. Jhi pwi yaox khaix taix Siyiex mai kham sakse
4. Jhi pwi yaox siawpsibrawm Siyiex pa daox pa am kuceu mai kham sakse heue.

Kham sakse kheu pa tix?

1. Kham sakse kheu krax teem Khwan Singax Singeh (Kawncau 1:8)
2. Kham sakse kheu siawpsibrawm Siyiex (Kawncau 1:8)
3. Kham sakse kheu lox tawm Yesux ka ex (Mathiex 28:19)
4. Kham sakse kheu riang rao pa tawx Siyiex ka ex heue. (Philippix 4:13)

Kham mhai sakse ka ceu patix?

1. Kham sakse ka lox sikah pa khaw pa mhawm
2. Kham sakse ka pakpeung pa mhawm
3. Kham sakse ka kaing yuh tix pa nyawm ti jhak
4. Kham sakse ka krax im ju pa rah pa see.

Kham sakse yuh ka mawx?

1. Rawgbwan mai kham mhai sakse
2. Viex rhawm rah see mai kham mhai sakse.
3. Yaogyaw bwanson mai kham mhai sakse

4. Doh keud ka lox tawm Yesux mai kham mhai sakse.

Can kaing pa kham mhai sakse kuceu khawmuik, awm pa khaw mai alo Siyiex khankix, mawh kaing pa hoik laug Siyiex ka kawn praix tix, kieh ex yuh heue. Mawh pa caw ti yuh ku singaix, mawh pa caw ti yuh kudah kudee, mawh pa caw ti yuh ka pwi kuceu ku ru, mawh pa caw ti yuh tom sidah ju tix heue.

\*\*\*\*\*

## 6. SAWG TAOH KHWAN KHAING DAUX PHIMAP

 *Pwi pa pon ka ju pwi khankix, mawh pwi pa koe cuyi pingnya heue. (Lox Kab 11:30)*

Simiang Siyiex hoik laug ka kawn khrit pwi yumrhawm khankix sinax kawn pwi haktiex in, mai ciak ti tawx beeh glawm pa ting pa lhaong, pa mawh beeh glawm sonsang sawg ti taoh ka can khwan pa grai daux phimap tom nie heue. Siyiex sidaing moh ka khwan khankix, mai ang rhawm kieh khwan tix mu kawx mawh pa nai pa nawk, daux meung mawnarhok heue. Mawh khu jao an, Siyiex hoik laug ti teei ka kawn khrit, mai kieh yuh kaing pa ting pa lhaong pa mawh kaing sawg taoh ka khwan pa grai tom nie piang haktiex in heue.

### Sawg taoh khwan pa grai khu pa tix?

1. Khwan mawh pa hoik phlu Siyiex bhawm pa im ka daux kawn pwi tom yam jah ti phan ti yuh kawn pwi dixdix heue. (Yam Jah 2:7)
2. Khwan mawh pa ting ngawh ting jum khaing haktiex raoma khawmuik heue. (Mathiex 16: 26; Makux 8: 35-38)
3. Khwan mawh pa koe leeing ju leeing phan. (Yohan 3:16-18)
4. Kaing pa sawg taoh ka khwan, mawh kaing pa cau pa nhie Yesux kawn khrit khankix yuh heue. (Mathiex 28:19-20)
5. Siyiex kiied lhaw k silai ka khwan khankix, mai ang rhawm kieh som nai pie tix mu kawx heue. (Yohan 10:28-29)
6. Mawh khu Siyiex kiied moh ka haktiex, kiied moh ka khwan pa ting ngawh ting jum heue. (Yohan 3:16)

7. Siyiex simie ti kieh khwan pa kaoh khaing Nawh Cao khankix, deeh hoek ka Nawh khawmuik heue. (Yohan 10: 28-29, Mathiex 11:28)

### Ceu pa lo ti koe daux pwi hu sawg taoh khwan pa grai

1. Pwi pa hu taoh khwan khankix, mawh pwi pa hoik koe khwan pa im daux Cao Khrit kadaux nawh heue.
2. Pwi pa hu taoh khwan khankix mawh pwi pa hoik appong krax im ju tix khawmuik kadaux tawm taix Siyiex heue.
3. Pwi taoh khwan khankix, mawh pwi pa moh ka Siyiex mai pwi pa chix moh ka khwan khankix heue.
4. Pwi taoh khwan khankix, mawh pwi pa hoik koe gumlox Siyiex kadaux nawh, mai pa eenrhawm ka Siyiex heue.
5. Pwi taoh khwan khankix, mawh pwi pa ting riang daux krax rawgbwan, mai pa chix yuh alo Siyiex heue.
6. Pwi taoh khwan khankix, mawh pwi pa naog ka khwan Singax Singeh Cao heue. (Efesux 5:18)
7. Pwi taoh khwan khankix, mawh pwi pa chix lhat graung mai cunghiet ka Simiang Siyiex heue.

### Daux krax daux blawng pa krai Loxbwan

- ☒ Rawgbwan mai krai Loxbwan gauxrhawm
- ☒ Viex rhawm kua mai krai loxbwan gauxrhawm
- ☒ Ang lai pau ti pon akhwang pa mhawm, krai yam koe bawgyam

- ☒ Ang lai krai pa lih daux rhawm tokaux tix, krai pa khaw mai alo Siyiex
- ☒ Krai lox pa nhim pa awn, mai ang kieh lox krai tix lud loe daux rhawm pwi
- ☒ Tawx akhwang sonsang deeh krai pwi tang kaux lox sang krai tix
- ☒ Ang thung thiang lox mai pwi pa rieb nghiet ka loxbwan gauxrhawm gauxrhi
- ☒ Ang nheen ang niied ti chawk ka pwi
- ☒ Sawg ti pon akhwang mai rawg bwan tau mai pwi pa rieb nghied lox bwan heue.

\*\*\*\*\*

## ▲ 7. KRAX PA APPONG KA SIYIEX ▲

Siyiex koe alo ti kieh kawn pwi mawh pa appong ka Nawh Cao khawmuik heue. Phan kawn pwi ang lai appong tokaux tix ka Siyiex, ang doh chix tibawg kawx heue. Grawhgrawng nawh, kawn pwi khawmuik mawh pa iak riang iak rao tete telai, mai ang koe pwi pa mhawm pa grum naog pie tix kaux kawx heue. Mawh kheu nan, kawn pwi lo ti appong krax im ju tix khawmuik kadaux tawm taix Siyiex ang jud ang jai heue.

Can kawn pwi piang haktiex in khawmuikl khawm leeing, mawh pwi pa chix laux chix leeing, mai chix som chix nai, ang chix kaux chix cong tibawg kawx. Phan ang appong tokaux tix ka Siyiex, kawn pwi sang chix koe bwanson yuh ka mawx? Sang chix yuh patix ka riang tokaux tix lie? Ang doh chix pon kah tibawg kawx, pon ang doh chix tete heue.

Kaing pa yuh kawn pwi, mai can kaing pa kiied koe rhawm kawn pwi pa koe greem singaix khawmuik, chix koe bwanson yuh ka mawx? (Tawx Cuyi 2:22). Kawn pwi coca miex ding angah, ting riang miex ding angah, phan ang mawh alo Siyiex, ceu an khankix mawh pa nai pa nawk giex going heue.

Phuk lai Sigang Khri baox tiem ti deuh ah nin, phan Siyiex ang tawx akhwang, mawh pwi mawx pa sang pon ih lie? Mawh pwi mawx pa sang pon rieb cie kah lie? (Tawx Cuyi 2:25). Can ceu pa lih ti mawh khawmuik khawm leeing, mawh akhwang pa tawx Siyiex heue. Mawh kheu nan, can kawn pwi piang haktiex khawmuik khawm leeing, keung khaw ti appong krax im ju tix ka daux tawm taix Siyiex tete telai heue.

Can pwi khawmuik khawm leeing, hoik lud krax tix heue. Kix hoik rham hoik yungyang awm paox tix khawmuik heue. Pwi pa yuh pa mhawm ang koe, pon ang koe tix kaux kawx. (Yaogyaw 14: 3)

Mawh kheu ang koe pwi grum naog mai pwi pa mhawm pie tix kaux kawx. Simiang Siyiex tom simie ti kieh kawn pwi appong tokaux tix kadaux tawm taix Siyiex, khaix an, Siyiex rieb cox priex, mai prawng ca ka krax ot koe kawn pwi sonsang lih mawh pa mhawm pa grum naog kadaux kuceu, kheu siawpsibrawm krax chaoxrhawm Nawh Cao heue. (Yaogyaw 37: 5)

#### Appong ku jheeng jheeng

1. Appong tokaux tix jheeng jheeng
2. Appong krax im ju tix jheeng jheeng
3. Appong krax ot krax koe tix khawmuik ku jheeng jheeng
4. Appong riangrao krax chix krax tawng tix ku jheeng jheeng
5. Appong bawgyam tix ku jheeng jheeng
6. Appong can ceu pa koe tix ku jheeng jheeng
7. Appong rhawmrhi, ju khwan tix ku jheeng jheeng heue.

#### Bwanson krax appong

1. Ang lai chix yungyang deeh laig kadaux alo nex nham.
2. Hoik pon pa kaux cong kheu hoik koe nawh daux tawm taix Siyiex heue.
3. Hoik pon pa fahrhawm, mai krax nyawm rhawm heue.
4. Hoik kaux cong dee een rhawm mai dee keud pot heue.

5. Phicaox cao nyaw ang lai chix pon kwang ka nawh heue.
6. Viang goh kawx, ang chix hoek krax laux leeing.
7. Ang lai som, hoik pex ka alo haktiex heue.

Can kawn khrit pwi yumrhawm khawmuik, caw ti appong tix ka Simiang Siyiex laohlaoh liellie, mai tawx tokaux tix ti kieh mawh kraung khrai pa shiao Siyiex heue. Phan ang yuh nan, kawn khrit kawn koe krax yungyang mai krax lhat krax graung, kheu ang nyang pon ka krax pa priex pa rien Siyiex tom grum tom naog heue. Pwi mawx angah, phan ang nyang koe daux tawm taix Siyiex, yie chix koe krax iak riang iak rao tom nie, mai sidah khaix, mawh pa hoek kadaux krax laux krax leeing heue.

#### Phan ang appong ka Siyiex

1. Ang koe bwanson tidtix daux krax im ju tix heue.
2. Ang koe ngawh jum daux krax im ju tix heue.
3. Lih mawh pa giexgoing pa nai pa nawk heue.
4. Lhat graung mai khirhawm khirhi heue.
5. Ang pon kham pon geu daux krax nyaw krax glaw heue.
6. Ang koe dee kaux rhawm dee nyawm rhawm tibawg kawx.
7. Ang koe dee een rhawm pa kaux cong.

Plee ceu pa khirhawm pex khawmuik ka piang Nawh Cao, kheu kia ngieen Nawh ka pex ku jheeng jheeng heue. (1 Petru 5:7)

Niied ti coca yuh ka mawx, sonsang pon maix ti tawx tokaux tix ka Siyiex. (2 Timose 2:15)

## 8. COCA HAWT YUH ALO SIYIEX

Pa kiied ting ceu ka son kawn pwi ka piang haktiex khawmuik khawm leeing, mawh pa yuh alo Siyiex heue. Pa lheu ting khaing pa yuh alo Siyiex ang lai chix koe tix ceu kawx heue. Siyiex mawh Siyiex pa ting pa lhaong ka piang kuceu khawmuik, mai mawh Siyiex pa tawng ka can kuceu khawmuik heue.

Alo Siyiex mawh pa ting ceu khaing can kuceu khawmuik, mai mawh pa mhawm khaing kuceu khawmuik heue. Simiang Siyiex kieh kawn pwi lih koe, mai im ju ka piang haktiex in, sonsang mawh pa hawt yuh alo Cao heue. Phan jhak ka alo Siyiex pa jhi ti deuh daux Phuk lai Sigang Khri, ex pon ti tawng awm in pa jhi plak greem tin heue.

### Alo Siyiex

1. Alo Siyiex, mawh pa sang kieh kawn pwi khawmuik hoek krax taoh, mai tawng ka pa mawh pa meh heue. (1 Tim 2:4)
2. Alo Siyiex, mawh pa sang kieh kawn pwi khawmuik yumrhawm ka Cao Khrit pa mawh Kawn Cao pa ploi Siyiex lih hoek piang haktiex in heue. (Yohan 6:29)
3. Alo Siyiex, mawh pa sang kieh pwi yumrhawm khawmuik pon ju leeing ju leeing phan heue. (Yohan 6:40)
4. Alo Siyiex, mawh sang kieh ex yuh paoxpie tau mai Siyiex, kheu Kawn Cao Yesux Khrit heue. (Kawlaw 1:20)

5. Alo Siyiex, mawh pa ang sang kieh pwi yumrhawm kukaux yuh krax phit krax lud, tix ceu kawx heue. (1 Thesalonix 4:3-6)
6. Alo Siyiex, mawh pa sang kieh kawn pwi pa yumrhawm, koe krax pa singax singeh heue. (1 Thesalonix 4:3)
7. Alo Siyiex, mawh pa sang kieh pwi khawmuik yaogyaw ka bwanson Keeing Cao kadaux Yesux Khrit. (1 Thesalonix 5:18)

Kawn khrit pwi yumrhawm khankix caw ti cied tokaux tix tete telai heue. Mawh rug yuh ex alo Siyiex lie? Phan ang mawh nan, mawh im ju ex daux pa yuh alo cao tix lie? Lo ti cied ti yaox tete telai heue. Kawn khrit plak nie, yuh pa khaw rhawm tokaux tix, viang ah ti yuh kaing Siyiex kawx, ang tic yuh alo Siyiex tete, yuh pa khaw rhawm tokaux ti sivoe heue. Phan ang nyang khaw ka rhawm rhi tokaux nawh, viang mawh pa koe alo Siyiex miex ding kawx, kawn pwi yie chix prah chix grham ti deuh heue. Phan krai tete telai, alo Siyiex ang chix ti prah grham tibawg kawx heue. Mawh kheu alo Siyiex, mawh pa nie lheu ting lhaong khaing can pa koe kuceu heue.

### Pa tiebtie ka alo Siyiex

1. Pa ang yumrhawm ka Siyiex mai ka gum lox Phuk lai Sigang Khri.
2. Pa viex rhawm kua kadaux pa ang cu ang nghiet.
3. Pa kieh tokaux tix, mai pa kieh haktiex lheu ting khaing Siyiex.

4. Pa ting rhawm, pa ang lhat graung ka Siyiex.
5. Pa ang keud ang sawn, mai pa nieb yuh hawt rhawm tokaux tix heue.

Ceu inkix mawh pa tiebtie kawn khrit pwi yumrhawm khankix, ang pon yuh ka alo Siyiex heue. Phan ang yuh ka alo Siyiex, mawh kheu yuh ex alo haktiex, alo nex nham, mai yuh alo cao tix, kawn pwi ceu an, hoik mawh pa krub ka riang rao, mai tawx akhwang ka phicaox, dee sidah khaix, nawh mawh pa yuh alo phicaox heue. Yam sidah ju nawh mawh pa som pa nai leeingju leeingphan heue. Mawh kheu nan, can kawn khrit pwi yumrhawm khawmuik, nu angah, yie angah, caw ti coca hawt yuh alo Siyiex kubawg kuyam heue.

\*\*\*\*\*

## 9. IM JU DAUX KRAX RAWGBWAN

Can kawn khrit pa im ju daux krax rawg bwan khankix mawh pa ot kadaux Siyiex, mai mawh pa yuh paoxpie tau mai Siyiex, daux krax moh krax rhawm heue. Tix plak taix, mawh pa cu nghiet ka lox tawm Siyiex, mai yuh alo Siyiex heue. Khaix an, tix plak taix, nawh mawh pwi pa chix teei riangrao ka Siyiex, mai pa im ju kadaux Siyiex heue.

Kawn khrit tibliah, pa ang sax rawgbwan tix bawg kawx kawn koe tom nie heue. Pa kaig rawg bwan, pa lhat rawg bwan, pa khin pa kha ti rawg bwan khankix kawx, kawn koe tom nie heue. Can ceu kawn khrit pa yuh nan, pa ang nyang cu ti gauxrhawm rawg bwan khankix, pa ang nyang koe rhawm rien ti coca sau riang rawgbwan khankix, mawh pa kawn ot daux been pa nu pa cien, ang nyang pon ti klawm khaox glawm pa yie ti klawm, mai kraung pa chaong heue. Mawh kheu ang nawh nyang cu ti tah beeh glawm pa cien pa klawm tix, ka piang Yesux khrit, khawmuik heue. Beeh cien glawm cien cie nawh, hoek ti deuh piang Yesux tix plak ngie, pa deuk tix plak an, tokaux nawh kawn klawm heue. Kheu kawn koe glawm cien cie nawh piang nawh tix plak, tibawg blah, jalao nawh een rhawm rhi tix ka Siyiex, nawh kawn sawg ti yuh pa kawn khrit ang lai keung lai caw ti yuh heue. Lox pa kok Yesux ka ex, nhie ex kawn pwi hoek ka Nawh, gau tix ka Nawh, tawx glawm cien ka Nawh, mai teei ti klawm glawm Nawh pa yie ti klawm, mai kraung Nawh pa chaong heue. (Mathiex 11:28)

Lox rawgbwan pa gau Yesux

1. Yaogyaw mai tawx min plakngai ka Keeing Siyiex.
2. Rawg bwan kadaux pa koe alo Siyiex, ang lai mawh ngie pa simie tokaux cao tix ti rawg ngie khaing heue.  
(Mathiex 6:10)
3. Rawg ngie pa lo son tix ngaix hoik tix ngaix heue.  
(Mathiex 6:10)
4. Rawg Siyiex pluut ploi phimap tix, kheu ex kawx hoik pluut ploi ka phimap pwi tang kaux heue. (Mathiex 6:12)
5. Rawg bwan son ang sang hawt yuh alo phicaux mai rawg ti mawh pwi pa chix lawd luan khaing pa nyaw pa glaw heue. (Mathiex 6:13)
6. Rawg bwan deeh ap kuceu kadaux tawm taix Siyiex mai rawg Siyiex kwang ka tix, ka siawp sibrawm, mai ka min plakngai leeing ju heue. (Mathiex 6:13)
7. Rawg bwan deeh appong khawmuik ka Siyiex son ang sang mawh alo tokaux tix, sonsang mawh alo Siyiex tom ghoik ah *Amen* heue. (Mathiex 6:13)

Yesux mawh kawn Siyiex, viang mawh kawx nan kawn rawg bwan jah yam sivoie ang nyang laig yuh kaing Keeing Cao Siyiex, tom sidah ka sivoie sang yum Nawh piang khaoxlhak heue. Nawh cao ang rawg bwan ceeix ceeix ngie khaing, hoik rawg bwan tom rawm lauh Nawh hoik lih mawh nham heue. Yesux tawx bawgyam tix rawg bwan tom grum tom naog heue. Mawh kheu nan Nawh Cao tom chix pon kham geu ka piang khaoxlhak heue. Ex pa mawh pwi iak

iak rao khankix, nie lheu khaw ti rawg bwan miex ding? Caw ti tawx bawgyam tix rawg bwan khawm rhawm khawm rhi tix, tete telai heue.

Rawg bwan yuh nin

1. Yumrhawm khawmuik mai rawgbwan tete heue.
2. Klop hieh rhawm rhi tix ka Siyiex mai rawg bwan heue.  
(1 Simiang 1:15)
3. Een rhawm ka Siyiex, mai rawg bwan heue.
4. Viex rhawm awn tix, mai rawg bwan heue.
5. Appong tix, mai rawg bwan heue.
6. Pluat ploi phimap tix, mai rawg bwan heue.
7. Viex rhawm kua tix mai rawg bwan heue.
8. Gauxrhawm, yaogyaw mai rawg bwan heue.
9. Vie rhawmrhi tix khawmuik, mai khawm ka dee chix keud tix khawmuik, mai khawm krax moh tix khawmuik mai rawg bwan heue.
10. Sawg meung Siyiex mai pa rah pa see phao ka, mai rawg can pa lo tix heue.
11. Rawg bwan daux ceukaux Yesux khaing heue.
12. Rawg bwan tau mai paox tix, rawgbwan kaux mawx kaux an heue.
13. Dee mawx angah, yam mawx angah, rawg bwan heue.
14. Rawg bwan twah pa ih pa un, rawg bwan pon ngawb cao cao, rawg bwan leeing lang sawm, rawg bwan sitoe tau,

rawg bwan rom taux, mai rawg bwan krax blawng kuceu heue.

15. Rawg pa khaw pa caw mai alo Siyiex ngie khaing heue.

16. Rawg bwan daux ceu kaux Yesux heue.

Yuh satix mai rien rhawm ka ceu inkix

1. Pa ang koe bawgyam, mai pa ang tawx bawgyam son krax rawg bwan.
2. Pa rawg ngie ti yuh alo nex nham ngie khaing.
3. Pa yuh grang tix, yuh min ti rawg bwan.
4. Pa ang pluot phimap pwi, mai pa yuh pa caox pa caig, pa yuh pa ang khaw alo Siyiex mai rawg bwan.
5. Pa koe rhawm ra mu, pa ting rhawm mai rawg bwan.

Kra rawg bwan pa ang khaw caw mai alo Siyiex

1. Pa ang yumrhawm mai keud jee keut blaong.  
(Lox Kab 28:9)
2. Pa ang cu nghiet mai veeh tix khaing Lox sidiex lox tawm beenli ( Lox Kab 28:9)
3. Pa rawg ti pon sonsang shiao son alo nexnham.  
(Yakop 4:3)
4. Pa koe rhawm ra mu (Yakop 1:8)
5. Pa viex rhawm ting rhawm lhaong (Lukax 18:12)
6. Ang tawng ceu pa rawg tokaux cao tix ( Mathiex 20:22)

Ceu inkix, mawh ceu pa caw ti rien rhawm, mai yuh satix, son ang sang koe kadaux pwi pa rawg bwan khankix heue. Mawh kheu inkix, mawh pa tiebtie ka bwanson pa sang hoek khaing Siyiex Cao bwan Cao son heue.

▲ 10. BEEH GLAWM SON KAWN KHRIT ▲

Beeh glawm pa tawx Siyiex ka kawn khrit, ang awm beeh glawm pa tawx haktiex in tix ceu kawx heue. Mawh kheu mawh beeh glawm pa tawx Siyiex, cao pa ting siawpsibrawm piang kuceu khawmuik, beeh glawm in, kiied tang siyox khaing beeh glawm haktiex in miex nyao heue. Beeh glawm piang haktiex in, mawh son piang haktiex ngie khaing heue. Phan mawh beeh glawm pa tawx Siyiex ka kawn khrit pwi yumrhawm khankix, mawh pa dex pa shiang mai meung raoma, mai ju leeing ju leeing phan heue.

Simiang Siyiex tawx beeh glawm pa ting pa mhawm, ka can kawn khrit pwi yumrhawm khawmuik heue. Pa laug ti teei mai pa ciak ti deuh ka pwi yumrhawm khankix, phan krai tete, mawh sonsang klawm beeh glawm pa tawx Siyiex, yam in ju piang haktiex in heue. Mawh pa kieh ex klawm tom sidah hoik, mai tom sidah ju tix heue. Khaix hoik uik bawg yam ex, mai khaix uik hoik kaing ka piang haktiex, Siyiex tag tawx khawngphak laksawng ka can pwi pa yuh kaing kukaux, awm pa khaw mai diag kaing pa yuh nawh heue. (Kalatix 6:9-10; 1 Kawrinthux 15:58)

Beeh glawm son kawn khrit

Viang mawh kawx nan, ka kaux pwi mawx kaux pwi an, hoik tawx ceu pa plak jhi Khwan Cao sonsang pon bwanson heue.(1 Kawrinthux 12:7)

1. Yesux nhie kawn khrit pwi yumrhawm khankix hu ka ceu pwi haktiex khawmuik, sonsng kieh pwi mawh kawncau

mausoi Nawh Cao heue. (Mathiex 28:19-20)

2. Yesux nhie kawn khrit pwi yumrhawm khankix hu kham sakse Nawh, jah dee ot dee koe cao tix, tom hu ti baux hoik tix baux, tix glhaw k hoik tix glhaw heue. (Kawncau 1:8)
3. Yesux nhie pwi yumrhawm khawmuik hawt khaix Nawh Cao heue. (Yohan 12:26, Mathiex 8:22)
4. Yesux nhie pwi yumrhawm khawmuik hu ti kraik gum lox bwan gauxrhawm gauxrhi kudah kudee heue. (Mathiex 16:15)
5. Yesux nhie kawn khrit pwi yumrhawm khankix hu sawg ka yung pa grai khankix phaoka heue. (Mathiex 10:6)
6. Yesux ploi kawn khrit pwi yumrhawm khankix hu, awm hu yung sinsax sox la pa caox heue. (Mathiex 10:16)
7. Yesux nhie kawn khrit pwi yumrhawm khankix rawg bwan mai pau ti jhak heue. (Lukax 21:36)
8. Siyiex tawx beeh glawm ka kawn khrit pwi yumrhawm sonsang priex sang pau, ka can ceu pa hoik phan hoik yuh Nawh khawmuik heue. (Yam Jah 1:27-28)

Pa kiek Siyiex kawn pwi lih hoek ka piang haktiex in, mai pa phan pa yuh Siyiex ti deuh ka kawn pwi ka piang haktiex in, mawh pa kiied ting raux dee bleeh, mai mawh kiied lang teung ting ngawh ting jum, mai mawh pa kiied sidaing jiet mhawm heue.

Krax pa phan pa deuh Siyiex ti tawx bwanson pa lang teung ting, pa lang teung mhawm ka kawn pwi, tom yam jah

vahma larawm dixdix, mawh beeh glawm pa ting lhaong, pa blon mhawm, pa tawx Nawh Cao ka kawn pwi heue. Siyiex phan yuh ka kawn pwi son beeh glawm heue. Beeh glawm an khankix, mawh alo Siyiex heue. Phan kawn pwi tix kaux lih koe ka piang haktiex in, caw ti tawng dom mawx dom an, Siyiex hoik kiek pwi tix kaux baux lih hoek, sonsang klawm beeh glawm pa tawx Siyiex ka piang haktiex in heue.

Pwi pa ang koe beeh glawm, mai hoek giexgoing ka piang haktiex in ang koe tix kaux kawx heue. Phan pwi mawx angah, hoek ti im ju ka piang haktiex in giexgoing, yam sidah ju nawh piang haktiex, mai yam hoek nawh daux meung raoma ju khaix sax, laksawng pa tawx Siyiex ang koe ka son nawh heue. (Plak Jhi 2:11)

#### Beeh glawm pa tawx Siyiex

1. Siyiex phan yuh kawn pwi son beeh glawm (Yam Jah 1:26)
2. Pa phan pa yuh Siyiex ceu pwi lih koe piang haktiex in tix ceu, mawh beeh glawm heue. (Yam Jah 11:1-9)
3. Krax im ju kawn pwi kukaux kawx, mawh beeh glawm heue. (Yakop 4:14, Yaog 150:6)
4. Krax chix krax tawng pa koe kawn pwi kaux pwi mawx kaux pwi an kawx, mawh beeh glawm heue. (1 Kaw 6:20; 1 The 5:23)
5. Pa krub ka Siyiex pa im ju, mawh beeh glawm heue. (Yohan 14:12)

\*\*\*\*\*

## 11. KAWN KHRIT HOIK PEX KHEU CAO KHRIT

Simiang Yesux Khrit hoik pex meung yum, hoik pex ka krax yum, hoik pex ka haktiex, hoik pex ka phicaox phicaig, hoik pex ka can kuceu khawmuik heue. Nawh Cao mawh Siyiex pa phan pa yuh ka kuceu kucawng khawmuik khawm leeing heue. Nawh Cao mawh cao pa ting siawpsibrawm, mai pa ting min plakngai ka piang kuceu khawmuik heue.

Yesux Khrit pao ti kieh pwi haktiex khawmuik tawng mai ah nin, **Aux hoik pex ka haktiex heue.** (Yohan 16:33) Yesux Khrit mawh Cao pa pex, mai pex ka can kuceu khawmuik heue. Ang joeng mawh ngie tokaux Nawh Cao pa pex ngie khaing, can pwi pa yumrhawm ka Siyiex, mai can pwi pa krub ka Nawh Cao khawmuik khawm leeing, Cao Khrit hoik tawm lox ah nin ka kix:

*Ka kaw pa pex, Aux hoik kieh nawh ngawm tau mai Aux ka piang dangngeung Aux, awm Aux kawx hoik pex, mai ngawm tau mai Keeing Aux ka piang dangngeung Nawh heue. (Plak Jhi 3:21)*

Kawn khrit pwi yumrhawm khankix, hoik pon ceu pa pex kheu Cao taoh Yesux Khrit heue. Yesux Khrit mawh Cao pa pex, mai koe siawpsibrawm ti tawx krax pa pex ka pwi pa yumrhawm ka Siyiex khawmuik heue.

Ceu pa pex kawn pwi haktiex kadaux kuceu, mawh tivud ticu, mai ang chix kaux cong heue. Mawh pa vai ti pex tivud ngie, mai ang lai mawh son ju leeing ju leeing phan heue. Krax pex kawn pwi haktiex, mai krax pex kawn Siyiex pa mawh pwi yumrhawm khankix, ang chix ti tiag cheu ka paox tix

tibawg kawx heue. Kawn pwi tiblah, keud ti chix pon pa pex kheu riangrao kawn pwi, mai coca sau riangrao ti yuh krax twah krax klaung pa mhawm kuceu heue. Kix coca rawg bwan ka daux riangrao kawn pwi, khawm ang koe krax yumrhawm ka cao pa pex, pa mawh Simiang Yesux Khrit heue. Phan ang tawng, mai phan ang yumrhawm een rhawm ka cao pa hoik pex, pa mawh Yesux Khrit Cao taoh, nawh ang koe daux krax pa pon pa pex tix bawg kawx heue. Mawh Yesux tix kaux khaing pa pon tawx pa pex ka pwi yumrhawm khawmuik heue.

- ✠ Chix pon pa pex kheu riangrao siawpsibrawm Siyiex ngie khaing heue. (Efesux 6:10)
- ✠ Chix pon pa pex kheu krax yumrhawm ka Cao taoh Yesux Khrit heue. (Yohan 3:16-18)
- ✠ Chix pon pa pex kheu pa thiang ti tik alo tokaux tix, mai pa hawt yuh alo Siyiex heue. (Yohan 6:29)
- ✠ Chix pon pa pex kheu ceu pa nghiet gumlox tawm jhawm krai Siyiex, mai pa een rhawm, rawg bwan kadaux ceukaux Yesux heue. (Yohan 15:7)
- ✠ Chix pon pa pex kheu pa pon Khwan Singax Singeh Cao, mai pa im ju daux pa thung bung Khwan Cao heue. (Kawncau 1:8)
- ✠ Chix pon pa pex, kheu pa klawm khaoxlhak Yesux mai hawt khaix Nawh kadaux pa kaux sijax heue. (Plak Jhi 2:10)
- ✠ Chix pon pa pex kheu yuh ceu pa mhawm kadaux ceukaux Yesux Khrit heue. (Romax 12:21)

Phan hoik pon pa pex kheu Yesux, ang lai khaw ti deeh ot greem pa nyaw glaw phicaox heue. Kawn khrit pwi yumrhawm khankix tiblah, krai ti hoik ot kadaux Cao Khrit, mai ca kawn gauxrhawm pot kadaux alo nex nham heue. Can pwi pa ot ka daux Cao Khrit, nawh hoik pon pa pex tau mai Cao Khrit, nawh ang lai chix ot kadaux alo nex nham, kheu nawh hoik mawh pwi Siyiex, mai hoik pex tau mai Cao Khrit heue. Kawn khrit pwi yumrhawm khawmuik, sawn tokaux tix mawh pa hoik yum tau mai Cao Khrit, mai pa deeh kaoh im tau mai Cao Khrit heue. Mawh kheu nan caw ti pex ka pa caox pa caig pa seeing pa brai ku singaix heue.

Kawn khrit pa hoik pex

- ☞ Kawn khrit ang lai chix ot daux phimap
- ☞ Kawn khrit ang lai chix ot daux pa caox pa caig
- ☞ Kawn khrit ang lai chix ot daux pa seeing pa brai
- ☞ Kawn khrit ang lai ot daux pa koeng pa khoi
- ☞ Kawn khrit ang lai chix ot daux pa hai pa meuk
- ☞ Kawn khrit ang lai chix ot daux pa phit pa vao
- ☞ Kawn khrit ang lai chix ot daux pa lud pa loe
- ☞ Kawn khrit ang lai chix ot daux pa lhat pa graung
- ☞ Kawn khrit ang lai chix ot daux krub riang rao
- ☞ Kawn khrit ang lai chix ot daux pa yuh meeig mieang
- ☞ Kawn khrit ang lai chix ot daux pa tawx sibawk chawk jhai

- ☞ Kawn khrit ang chix ot daux pa kok khwan
- ☞ Kawn khrit ang lai chix ot daux pa silai daux alo nex nham
- ☞ Kawn khrit ang lai chix ot daux pa yuh phicaox
- ☞ Kawn khrit ang lai chix ot daux pa ih ceu pa yoek pa awp
- ☞ Kawn khrit ang lai chix ot pa ting rhawm ting rhi
- ☞ Kawn khrit ang lai chix ot daux pa lhat ka sijax singie
- ☞ Kawn khrit ang lai chix ot daux pa yuh priex pwi yum mai sikah mai pwi yum mai pa yuh pa ang khaw mai alo Siyiex khankix heue.

Ceu inkix ang lai chix dex chix shiang mai kawn khrit, kheu kawn khrit mawh pa hoik pex ka ceu in khawmuik heue. Phan kawn khrit mawx angah, ca kawn gauxrhawm yuh ceu in khankix, an mawh pa teei ceukaux kawn khrit giexgoing, mai ang pon pa pex tau mai Cao Khrit heue. Phan rug hoik pon pa pex tau mai Cao Khrit tete telai, yuh ka mawx, ca kawn ot greem pa seeing pa brai khankix- kawn khrit pa hoik pex tau mai Cao Khrit, mawh pa hoik dig phicaox greem tieag caong tix, kheu siawpsibawm pa tawx Yesux Khrit ka nawh heue.

☞ *Lox pa deuk mawh nin, kheu koe riangrao ka daux Simiang, mai kadaux riangrao siawpsibawm Nawh heue. Ceep kraung naing Siyiex khawmuik yuh ka mawx, sonsang pon pex ti tiebtie ka jhawm lhak phicaox heue. (Efesux 6:10)*

## 12. VIA HU KHAING PACAOX PA CAIG

Can pwi pa hoik yumrhawm ka Simiang Yesux Khrit ku kaux, kix hoik sigrhah kadaux nham Cao Khrit, mai hoik hoek kadaux krax pa singax singeh heue. Mawh kheu nawh hoik lih mawh kawn Siyiex tix kaux, nawh ang lai ot kadaux phimap heue. Nawh hoik mawh pwi pa via hu singai khaing phimap pa seeing pa brai kuceu, mai gauxrhawm im ju daux ceu pa singax singeh heue.

Pwi pa hoik ot kadaux Cao Khrit kukaux daux pwi, mawh pwi pa chix via hu khaing pa caox pa caig, mai pa hawt grawng lawng khaix Yesux Khrit kadaux pa mawh pa meh, pa khaw pa caw heue. Viang kawn ot piang haktiex in, sinax ceu pa caox pa caig pa seeing pa brai kuceu kawx, kheu nawh hoik mawh kawn Siyiex tix kaux, phimap pa seeing pa brai, mai can ceu pa caox pa caig kuceu, ang lai dex lai shiang mai nawh heue. Nawh via hu singai khaing pa ang mhawm kuceu, mai gauxrhawm daux pa hawt yuh alo Siyiex ngie khaing heue. Phuk lai Sigang Khri, hoik tiem ti deuh ah nin,

☞ *Paw dex paw yuh, via khaing ceu pa caox kuceu awx.  
( 1 Thesalonix 5:22)*

☞ *Kieh krax moh krax rhawm pex mawh pa ang koe  
pa pie pa lhen, koeng ka pa caox pa caig, mai jawg  
ti giex ka ceu pa mhawm heue. ( Romax 12:9)*

Kawn khrit khankix koeng ka ceu pa caox pa caig kuceu, mai coca ti ot kadaux pa mhawm pa mhiem heue.

Grawhgrawng nawh, kheu nawh ang lai mawh kawn phimap, mawh kheu nawh hoik lih mawh kawn Siyiex tix kaux, nawh hoik ot daux Siyiex pa mhawm, mai yuh pa singax singeh heue. Nawh yuh pa oxpie ka ceu pa mhawm kuceu mai koeng ka pa caox pa caig kuceu heue. Nawh ang lai nieb pon yuh phimap ka rhawmrhi ka dee chix keud tix, phan ang mawh pa krox man nawh ti yuh, yam pi awm nawh rhawm tix tivud heue. Can pwi pa koe piang haktiex in khawmuik khawm leeing, mawh pwi pa chix lud chix loe heue. Viang mawh kawx nan, pwi pa pon ti mawh kawn Siyiex kukaux daux pwi, viang nawh chix lud yuh kaing ceu pa ang mhawm tibawg bawg kawx, nawh ang doh chix lhoe ti yuh tokaux tix laux leeing daux ceu pa ang mhawm khankix heue. Yam nawh doh keud ka bwanson Siyiex pa hoik laug ka nawh, mai hoik sigrhah tix ka nham, nawh tag sang yaog ti kaoh dom mawx dom an, khyox khaw ka Siyiex heue. Ka daux Phuk lai sigang khri tix dah ba ox tiem ti deuh ah nin,

☞ *Ex tawng kraung pwi kukaux daux pwi, pa Siyiex  
hoik kieh kix keh, ang yuh phimap phigrham, kaw pa  
Siyiex hoik kieh nawh keh, chix priex chix rien tokaux  
tix, kaw pa caox, ang pon teeh pon chuh ka nawh  
heue. (1 Yohan 5:18)*

Ka piang haktiex in kudah kudee, dee mawx kawx angah, hoik naog ka ceu pa caox pa caig pa seeing pa brai kuceu heue. Siyiex ploi kawn khrit pwi yumrhawm khankix ot kadaux sinax an, sonsang jhi pa mhawm Siyiex sinax kix heue. Yesux hoik krai ti deuh ka kawn cau Nawh khankix ah nin, *Aux ploi*

*pex hu, awm yung hu sinax sox la pa caox khankix heue.*  
(Mathiex 10:16)

Dee ot kawn khrit, ang mawh dee pa mhawm pa yien heue. Mawh dee koe pa caox pa caig pa seeing pa brai heue. Siyiex ang lai kieh ex luan hu tang ot khaing haktiex, Nawh Cao kieh ex mawh pa ang hawt hu khaix ceu an khankix, mai kieh ex mawh pa via ka kaing pa ang mhawm, jhawm pa ang khaw pa yuh kix kuceu heue.

Tiebtie ka pa caox pa caig

1. Greed pex hoek dex ka Siyiex, mai tag greed ti hoek dex ka pex heue. (Yakop 8)
2. Kieh gumlox Cao Khrit ot kadaux rhawm pex tom nie. (Kawlawsie 3:16)
3. Ca niied ti rawg bwan pot, mai pau ti jhak kadaux an tau mai krax yaogyaw bwanson. (Kawlawsie 4:2)
4. Koeng ka ceu pa caox pa caig, mai jawg ti giex ka ceu pa mhawm heue. (Romax 12:9)
5. Rien rhawm tix ka grawng pa hu pex, paw kieh awm pa ang koe pingnya, kieh awm pa koe pingnya mai taoh ka bawgyam, kheu singaix in khankix mawh pa caox heue. (Efesux 5:15)
6. Ceep kraung naing Siyiex, yuh ka mawx, sonsang pon pex ti tiebtie ka jhawm lhak phicaox heue. (Efesux 6:11)
7. Kieh koe riangrao kadaux Simiang, mai kadaux riangrao siawpsibrawm Nawh heue. (Efesux 6:10)
8. Phan im kheu Khwan Cao viang pa hu ex kawx, kieh

mawh kadaux Khwan Cao heue. (Kalatix 5:25)

9. Kieh krax yumrhawm pex kaux cong. (Kawlawsie 2:7)
10. Priex rhawm kadaux kuceu khawmuik. (2 Timose 4:5)
11. Sidiex loxbwan. (2 Timose 4:2)
12. Kaux sijax tom yum. (Plak Jhi 2:10)

Via singai khaing ceu inkix

1. Ceu pa krub riang rao
2. Ceu pa teei saux plaux yum
3. Ceu pa koeng khoi paox tix
4. Ceu pa phit vao
5. Ceu pa eei ti cie simeed sat, singie, kluan, see mai kaing ceu pa ang mawhm kuceu
6. Ceu pa kok khwan
7. Ceu pa yuh taoh yuh miang
8. Ceu pa tawx priex pwi yum / sikah mai pwi yum
9. Ceu pa lhat ka sijax, singie, phicaox
10. Ceu pa krub ka phicaox phicaig, pa krub meeig krub mieang
11. Ceu pa yuh alo nex nham
12. Ceu pa ang een Siyiex ting daux ju tix.

Can ceu inkix, mawh pa ang khaw mai alo Siyiex tibawg kawx, mawh pa koeng pa seeing Siyieh kah heue. Phan hoik krai tokaux tix yumrhawm ka Siyiex, mai krai tokaux tix mawh kawn khrit, ang lai chix dex dawd ka ceu inkix tibawg kawx, caw ti via singai khaing ceu an khawmuik, mai een Siyiex ting ka piang krax im ju tix leeing ju heue.

\*\*\*\*\*

### ▲ 13. KRAX TIEH KRAX FEEN ▲

Phan pwi tix kaux kaux, hoik cim hoik cheu ti yaox krax moh Siyiex pa im ju, mai phan tieh feen khaing krax moh Siyiex, nawh hoik lih mawh pa nunai ka bwanson Siyiex tete heue. Nawh hoik lih mawh pa tawk toi ka Yesux Khrit kawn Siyiex ka piang khaoxlhak heue.

Kadaux ceu pa tix angah, dee mawx angah, kadaux krax ot krax koe pa yuh ka mawx angah, pa nu angah, pa yie angah, pwi pa hoik cim hoik cheu ti tawng ka ceu pa mhawm Siyiex, mai deeh tieh feen tix khaing Siyiex kheu grawng ceu an tix ceu ceu, Siyiex ang lai chix khaw caw rhawm ka kaw an tix bawg kawx heue. Grawhgrawng nawh, kheu nawh hoik tawng Siyiex mawh pa ting pa mhawm ka piang kuceu khawmuik, mai kawn baox yuh kieh krax moh Siyiex ang koe ceu heue. Nawh kawn yuh ti tieh feen khaing ceu pa lang teung mhawm khawmuik, pa mawh Siyiex piang Siyiex, mai nawh kawn sawg ti hu ka ceu pa ot greem caong Siyiex, ceu pa yuh nan khankix, hoik plukpliak ti tik ka krax moh krax chaoxrhawm Siyiex heue. Phuk lai Sigang Khri Siyiex hoik tiem ti deuh ah nin,

📖 *Kaux cong paw kieh chix gah chix greed, mai niied ti yuh kaing Simiang ku jheeng jheeng( 1 Kawrinthux 15:58)*

#### Pwi pa tieh feen khankix

1. Pwi pa tieh feen khaing Siyiex, hoik mawh pwi pa tieh feen khaing ceu pa mhawm heue.

2. Pwi pa tieh feen khaing Siyiex, hoik mawh pwi pa tieh feen khaing bwanson pa ting pa lhaong.
3. Pwi pa tieh feen khaing Siyiex, hoik tieh feen khaing ju pa im leeing ju leeing phan heue.
4. Pwi pa tieh feen khaing Siyiex, hoik tieh feen khaing krax rah krax see heue.
5. Pwi ceu an khankix, hoik ot greem sibrawm phicaox.
6. Pwi ceu an khankix, hoik pon pa som pa nai.
7. Pwi ceu an khankix, hoik ot kadaux pa laux pa leeing leeing ju leeing phan kadaux meung mawnarhok heue.

Phan mawh grawhgrawng kix pa hoik pon pa riieng tix bawg, mai hoik cim ti yaox ka khawngphak raoma, mai hoik kieh mawh pa rom ti pon ka Khwan Singax Singeh, mai hoik cim ti yaox ka gumlox Siyiex pa mhawm, mai ka siawp sibrawm khankix pa tag sang hoek ju khaix, mai hoik deeh tieh ka khaix, ang tau ti baox deeh kieh kix mawh pa khraox, ka pa doh keud doh sawn ka phimap, kheu kix baox deeh tie Kawn Siyiex yum ka piang khaoxlhak ka tokaux tix bawg, mai yuh ti kieh Nawh mawh pa kaig tua ka sivoe pwi heue. (Hebrie 6:4-6)

#### Ceu pa kieh tieh feen

1. Pa ang yumrhawm ka Siyiex
2. Pa ang een rhawm rawg bwan ka Siyiex
3. Pa ang cu ang nghiet ka gumlox Siyiex pa im ju
4. Pa ang ot daux cubcaw kawn khrit
5. Pa ang rieb teei ka pa thong gau Khwan Cao

6. Pa ang sawg ti tawng grawng krax moh Siyiex
7. Pa ca nie luan ting rhawm mai een rhawm ka krax keud tokaux tix, inkix khankix heue.

Kawn khrit tibliah yie chix koe krax tieh krax feen khaing krax yumrhawm tix heue. Grawhgrawng nawh, kheu kix ang kaux cong kadaux krax yumrhawm, mai kheu kix ang appong tokaux tix khawmuik kadaux tawm taix Siyiex heue. Pwi mawx angah, phan nawh hawt yuh alo tokaux tix, mai ang deuh Siyiex ting ka piang ju tix khawmuik, Satan tak gauhrhawm ka nawh mai nyaw glaw ka nawh heue.

Yam nyaw glaw Satan ka nawh, nawh tom deeh hoek kadaux pa nyaw glaw, mai krax yumrhawm nawh ot sipie yawm sipie, sidah khaix, lih ti mawh krax tieh krax feen khaing Siyiex Cao phan Cao yuh heue.

Pwi tibliah, cim ti yaox ka krax moh Siyiex tix bawg, mai deeh greed plak khaix tix heue. Ceu pa yuh nan, ang chix khaw caw mai rhawm Siyiex tibawg kawx heue. Mawh kheu hoik cim nawh ka ceu pa mhawm, mai deeh yoi tokaux tix khaing ceu pa mhawm an, sang chix mawh pa khaw caw ka rhawm Siyiex yuh ka mawx?

Nawh hoik yaox ka ceu pa mhawm, mai ang rieb ka ceu pa mhawm, nawh chix pon cie ka ceu pa mhawm yuh ka mawx? Ang doh koe daux krax ka son nawh, pie tix bawg kawx heue.

Can pwi pa hoik hoek ka Siyiex, phan ang yumrhawm, mai deeh veeh ngai tix khaing Siyiex, nawh hoik bheeik khaing bwanson pa hoik cox Siyiex, mai krax kharhawm hoik koe sivoie nawh heue. Can pwi pa tieh feen tix khaing Siyiex im ju kukaux, kix hoik rud rhim krax kharhawm hoek ka piang ju tokaux tix heue.

Kawn khrit pwi yumrhawm tete telai, ang chix tieh chix feen, mai kaux cong tom sidah ju tix, kheu riangrao siawp sibrawm pa tawx Siyiex ka nawh heue. Phuk lai sigang khri baox ah nin,

*Grawhgrawng nawh khaix hoik grum tawng ex ka pa mawh pa meh, phan ex baox ca nieb yuh phimap, ang baox lai koe ceu pa tan pa lu son phimap phigrham, tak koe pa keudpot cepot ceu pa lhat pa graung pa sang pon krax prawng krax ciyang, mai pa sangrhawm songrhi ngu pa tak sang gleeing ka kix pa koeng pa tiebtie khankix heue. (Hebrie 10: 26-27)*

\*\*\*\*\*

#### 14. KAWN KHRIT MAI KAING KRUB

Pa kiied sidaing ting ceu, son kawn khrit pwi yumrhawm khankix tix ceu, mawh kaing *Krub* heue. Phan hoik mawh pwi yumrhawm tix kaux, phan ang yuh kaing krub ang chix heue. Pwi mawx angah, pa hoik yumrhawm, pa hoik ap tokaux tix daux Siyiex tete, caw ti yuh kaing krub mai im ju tau mai Siyiex ku jheeng jheeng heue.

Kaing krub pa ah nan, ang sangah ka pa rawg bwan, ang sang ah ka pa yaogyaw nong nong ngie khaing, sang ah ka pa cox khre bawgyam, riangrao krax keud krax sawn, tokaux, rhawmrhi, ju khwan tix khawmuik, hoek ka Simiang Siyiex, ka krax yumrhawm, mai ka krax moh krax rhawm, mai ka krax pa lhat graung, nabyam yung yi, mai viex rhawm pa awn pa tiem, hoek ka Siyiex pa im ju heue. Yam yuh kaing krub yam mawx angah, caw ti prah grham pa dex dawd mai haktiex, mai alo nex nham khankix, mai hoek ka Siyiex khawm rhawm khawm rhi tix khawmuik heue.

Yam yuh kaing krub ka Siyiex im ju, ang lai chix kieh koe rhawm ra mu, ang lai chix ti neuex mai kaing nex nham, caw ti tang hu ka Siyiex tix kaux khaing, ka krax tix nyaing ngie khaing heue. Kaing krub ka Siyiex im ju tete, mawh pa caw ti yuh nan heue. Keud ti yaox pa koe daux Phuk lai Sigang Khri in ra dah heue.

 *Abraham ah nin ka kawncaw nawh khankix, ot tin tau mai la awawx, kawn nyawm mai aux, tag sang hu toi*

*plak an, mai krub ka Siyiex, mai tag deeh hoek ka pax heue. (Yam Jah 22:5)*

 *Sonsang tawx pex tokaux tix mawh pa tan pa lu, pa im, pa singax singeh, pa khaw pa caw ka rhawm Siyiex, pa mawh kaing krub pa keung pex ti yuh heue.*

*(Romax 12:1)*

Phan deeh sikaw ti tawng, mai keud ti yaox ka grawng kaing krub pa jhi daux Phuk lai Sigang Khri in ra dah, ex pon ti tawng kaing krub koe yuh nin awm in plak greem heue.

1. Kaing krub mawh pa hoek ka Siyiex im ju khawm tokaux, rhawmrhi, khwan ju mai khawm ka dee chix keud tix khawmuik heue.
2. Kaing krub mawh pa prah grham ti deuh alo nex nham khawmuik, kieh bawgyam tix singax son Siyiex heue.
3. Kaing krub mawh pa hoik dha ti cox khre ti deuh mhawm mhawm, ang lai kieh koe rhawm ra mu, pa yuh daux pa loig pa khaw heue.
4. Kaing krub mawh pa hu ti yaox ka Siyiex daux khwan, mai ot tau mai Siyiex, mai yuh paoxpie tau mai Siyiex daux khwan heue.
5. Kaing krub ka Siyiex, ang lai viex alo tokaux tix ceeix kawx, mawh ngie keud sawn pa khaw pa caw ka alo Siyiex khawmuik khawm leeing heue.
6. Kaing krub mawh pa appong bawgyam tix, krax im ju tix, tokaux, rhawmrhi, ju khwan tix khawmuik kadaux taix Siyiex, kieh mawh pa tan pa lu pa im heue.

7. Kaing krub ang lai mawh pa yuh daux pa khin pa kha, mawh pa yuh daux pa gauxrhawm fahrhawm, mai kadaux pa rah pa see, pa mawh pa meh heue.
8. Kaing krub mawh pa sikah ka Siyiex kadaux khwan, mai pa sawg ti tawng ti yaox alo Nawh Cao daux krax im ju tix heue.
9. Kaing krub ang lai mawh tokaux pa hu ka Siyiex, mawh khwan pa hu ka Khwan Cao, khwan pwi mai Khwan Cao yuh paopxie tau heue.
10. Kaing krub mawh pa yaox ka Siyiex, pa mhong lox Siyiex, pa yaogyaw min plakngai Siyiex, pa ot kadaux Siyiex, mai pa appong, tawx taing tokaux tix khawmuik ka Siyiex heue.

📖 *Siyiex mawh khwan heue. Can pwi pa krub ka Simiang Siyiex, krub kadaux khwan, mai kadaux pa mawh pa meh heue. (Yohan 4:24)*

Phan kaing krub ex ka Siyiex mawh pa yuh awm been haktiex, mai pa yuh hawt alo nex nham ngie khaing, an ang chix ti kok mawh kaing krub pa im, ang chix ti kok mawh kaing krub pa khaw pa caw ka rhawmrhi Siyiex heue. Kaing krub an, chix lih ti mawh kaing krub pa krub ka riangrao, kheu ang yuh daux khwan, kheu yuh pa khaw mai alo nex nham heue. Kaing krub ceu pa yuh nin, mawh ceu pa lauxrhawm ka son Simiang Siyiex heue.

### Kaing krub pa yuh hawt alo nex nham

1. Keud ti yuh pa khaw mai rhawm kawn pwi
2. Keud ti yuh pa mhawm grieang pakpeung plak praix
3. Ang pon tawx bawgyam tom grum naog
4. Yuh sonsang lih koe min plakngai sivo kawn pwi
5. Ang viex rhawm ti cu nghiet ka gumlox Siyiex
6. Ang dha ti cox khre mhawm mhawm
7. Ang tawx pa nie blon mhawm ka Siyiex, tawx pa haoh pa lheu ngie ka Siyiex khaing heue.

Yawsux krai ka pwi ceu Isarilax ah in,

📖 *Yam in, lhat ka Simiang Siyiex, mai krub ka Nawh ka pa singax, tau mai pa kaux sijax heue. Tik ka Siyiex pa tax du pex khankix krub, yam kawn ot kix plak an toi rawm klawng mai daux meung Ijiptux, mai krub ngie ka Siyiex leeing ju leeing phan khaing heue. ( Yawsux 24:14)*

📖 *Phan ang mawh nan, phan pex keud, ang khaw ti krub ka Siyiex leeing ju, Siyiex pa krub tax du pex toi rawm klawng plak an, pa koe dee ot pex, pa mawh Siyiex, pwi meung Amawrix an, mawh sang krub pex ka Siyiex pa yuh ka mawx, pex laug ka daux singaix in heue. Aux mai kawn nyiexma aux kieh nie, krub ngie ka Siyiex leeing ju khaing, ah nan heue. ( Yawsux 24:15)*

Pa ang khaw caw yam yuh kaing krub

- 1) Ang khaw ti krai lox haktiex
- 2) Ang khaw ti yuh pa khaw mai rhawm kawn pwi
- 3) Ang khaw ti sawg min plakngai kawn pwi
- 4) Ang khaw ti yuh lah cha ka paox tix
- 5) Ang khaw ti gaing: ti it
- 6) Ang khaw gap caong piang paox
- 7) Ang khaw deuh caong piang khaox ngawm
- 8) Ang khaw ti gup kaing: tix
- 9) Ang khaw ti kieh lox nghap tix luah lox
- 10) Ang khaw ti sikah ka paox tix
- 11) Ang khaw phat lai tiem lai
- 12) Ang khaw neung kaing: plak khaix tix
- 13) Ang khaw joh nyoi yam cung sikah
- 14) Ang khaw ceep mhok koe dak
- 15) Ang khaw ceep kraung dawd
- 16) Ang khaw ti ghak ti baig
- 17) Ang khaw ti kieh lox sinum luah
- 18) Ang khaw ti kieh kawn nyawm klieh
- 19) Ang khaw ti kieh kawn nyawm yiem rheung
- 20) Ang khaw ti viex cag sikah lox (phone)
- 21) Ang khaw ti thawng rieng yum / rieng im
- 22) Ang khaw ti thungthiang paox tix

Ceu in khankix mawh pa yuh daux alo nex nham, mai pa yuh daux alo tokaux tix heue. Phan kawn ca koe pa yuh nan kadaux kaing krub dee mawx angah, yam mawx angah, kaing krub an, ang nyang mawh kaing krub pa loig pa mhawm pa singax singeh plak sivoie ngai Siyiex heue.

\*\*\*\*\*

## ❀ 15. KAWN KHRIT MAWH CAO PRIEX SIN SIYIEX ❀

📖 *Kieh pwi een ex mawh pwi cau pwi soi cao Khrit, mai kawncau cao pa priex ceu pa raux pa mox Siyiex heue. Lheu khaing an, pa mawh kawncau cao pa priex, tag sang yaox grawng mawh nawh pa kaux sijax heue. ( 1 Kawrinthux 4:1-2)*

📖 *Simiang Siyiex, phan yuh ka kawn pwi, sonsang mawh cao priex cao pau ka can ceu pa hoik phan hoik yuh Nawh Cao khawmuik heue. Siyiex hoik dawg ap ti tawx beeh glawm in ka Adam Evax tom yam jah dix heue. ( Yam Jah 1:28)*

Simiang Siyiex moh ka kawn pwi, mai deuh kawn pwi mawh pa ting piang khawmuik, mai nawb bwan son kawn pwi, mai ap ti tawx beeh glawm cao priex cao pau sin cie Siyiex ka kawn pwi heue. Siyiex hoik kaux rhawm ka kawn pwi, tom tawx beeh glawm pa ting pa lhaong in ka kiex heue. Cao priex cao pau sin cie Siyiex kukaux, mawh pa priex pa pau sonsang kaux cong, sonsang haokhwan, sonsang ang koe pa som pa nai heue.

Viang mawh kawx nan, yam kawn pwi ang cu ti nghiit ka lox tawm Siyiex ti deuh an, kiex ang lai pon priex pon pau sin Siyiex heue. Kheu hoik laig phimap kadaux kawn pwi haktiex heue.

Khaix hoik hoek Yesux ti kham geu ka piang khaoxlhak, kheu phimap kawn pwi haktiex khawmuik Nawh Cao hoik deeh laug ti teei ka pwi yumrhawm khankix, mai ap ti tawx

beeh glawm ka kawncaw mau soi pa mawh pwi yumrhawm khawmuik, awm koe dauh Phuk lai Sigang Khri pa Khraox pa ah nin:

📖 *Pex laug ti teei Aux ang mawh, Aux hoik laug ti teei pex, sonsang plix pex plix haoh hun, mai sonsang kaux cong plix pex heue. (Yohan 15:16)*

Yesux laug ti teei ka pwi yumrhawm khawmuik, sonsang priex pau ka can ceu pa hoik phan hoik yuh Siyiex uik heue. Kadaux can ceu pa hoik phan hoik yuh uik an, khwan pa sau Siyiex kadaux kawn pwi, mawh pa ting ngawh jum khaing can pa koe kuceu khawmuik heue. Mawh khu nan, yam priex pau ka can ceu pa phan pa deuh Siyiex khawmuik an, caw ti jah ka kawn pwi, sonsang mawh can kawn pwi haktiex khawmuik pa tawng ka alo Siyiex, mawh sonsang yumrhawm kawn pwi ka Yesux Cao taoh, mai pon ju leeing ju leeing phan heue.

#### Priex pau ka sin Siyiex kuceu

- ➔ Priex ti tawng ka gumlox tawm jhawm krai Siyiex pa im ju
- ➔ Priex ka krax moh Siyiex, mai krax taoh Yesux Khrit
- ➔ Priex ka bwanson pa tawx Siyiex kuceu khawmuik
- ➔ Priex ka bawgyam kieh koe ngawh jum
- ➔ Priex ka tokaux mu ceu tix, kieh singax singeh
- ➔ Priex ka sok rhawm tix, kieh rah see
- ➔ Priex ka khwan ju tix, kieh ot dauh Siyiex
- ➔ Priex ka krax yumrhawm tix, kieh kaux cong
- ➔ Priex ka nyiexma tix, kieh hawt yuh alo Siyiex

- ➔ Priex ka paox pwi tix, sonsang koe min plakngai Siyiex
- ➔ Priex ka haktiex, raoma, rawm sigrit sigra mai can pa koe kuceu ku cawng
- ➔ Priex ka lox ah sikah krai tix, mai rhawm keud tix, mai krax ot krax koe tix, sonsang mawh pa kieh Siyiex koe min plakngai heue.

📖 *Kaw pa Siyiex hoik kieh nawh keh, chix priex chix rien tokaux tix, kaw pa caox ang pon teeh pon chuh nawh heue. (1 Yohan 5:18)*

#### Cao priex sin Siyiex mawh pa tan lu

- Cao priex sin bwan Siyiex chix appong bawgyam tix teem coi kadaux kaing jhaw Siyiex mai ka pwi pa lo khankix
- Cao priex sin Siyiex, chix tan lu mau khri, kraung khrai tix ka dauh kaing jhaw Siyiex
- Cao priex sin Siyiex, laug ti tan pa lheu mhawm ka Siyiex jheeng jheeng
- Cao priex sin Siyiex, chix kham geu son kaing ceu pa mhawm kuceu
- Cao priex sin Siyiex, mawh pa koe rhawm krax moh mai koe rhawm sibieh ti tan lu pa koe tix
- Cao priex sin Siyiex, mawh pa tan lu rhawmrhi tix, bawg yam tix, kraung khrai tix, kadaux pa khaw pa caw ka rhawm Siyiex
- Cao priex sin Siyiex, mawh pa viex rhawm krax moh, mai kaux sijax kadaux pa tan lu kubawg kuyam

📖 *Pa mawh kawncaw cao pa priex, tak sang yaox  
gawng mawh nawh pa kaux sijax heue.  
(1 Kawrinthux 4:2)*

\*\*\*\*\*

## ▲ 16. RIANGRAO PA PON KHAM PON GEU ▲

Riangrao kawn khrit, ang koe kadaux pa chix yaox ka ngai, ang koe kadaux kraung naing haktiex, ang mawh mau khri, ang mawh kawn pwi, ang mawh pingnya cuyi, ang mawh krax chix krax tawng , ang mawh phicaox phicaig, mawh Siyiex pa ting siawpsibrawm piang khawmuik pa mawh Siyiex leeing ju leeing phan heue.

Riangrao kawn pwi piang haktiex in, mawh pa ang chix kaux chix cong, mai mawh pa chix laux chix som heue. Phan een rhawm ka riangrao Siyiex, tom chix koe pa kaux cong heue. Ka piang haktiex in kudah kudee, koe pa khirhawm pa lhat graung kuceu, ku jheeng jheeng heue. Can ceu an khankix, ang chix pex ka kix ka riangrao kawn pwi, mai ang chix pex ka kix ka riangrao tix ceu kawx, mawh riangrao Siyiex tix ceu khaing pa chix pex pon heue. Haktiex in mawh dee ot dee koe phicaox, mai pa nyaw glaw kuceu, mai mawh dee yaox ti kham geu pa khirhawm khirhi kuceu heue. Viang mawh kawx nan, kawn khrit khankix kaux cong, mai pon kham pon geu ka ceu an khankix heue. Grawhgrawng nawh, kawn khrit mawh pa teei riangrao tix ka Siyiex, mai ot ka daux Siyiex heue. Phuk lai Sigang Khri tix dah hoik tiem ti deuh ah nin:

📖 *Lox pa deuk mawh nin, kieh koe riangrao kadaux  
Simiang, mai kadaux riangrao siawp sibrawm  
Nawh heue. Ceep kraung naing Siyiex khawmuik  
yuh ka mawx sonsang pon pex ti tiebtie ka jhawm  
lhak phicaox heue. (Efesux 6:10)*

Kawn pwi haktiex in khawmuik, mawh pa chix saux chix ngia, mawh pa chix laux chix som, mawh pa chix yum chix grai awm paox tix heue. Kawn khrit angah, ang mawh kawn khrit angah, situ awm paox tix heue. Viang pa yaox kawn pwi ti kham geu situ awm paox tix kawx, riangrao pa pon kham geu ka krax kham krax geu ankix, ang chix situ awm paox tix tibawg kawx. Mawh kheu riangrao kawn khrit ang dex dawd mai pa chix yaox ka piang haktiex in tix ceu kawx, mawh pa tawx Simiang Yesux ka pwi yumrhawm khawmuik heue. Lheu khaing Yesux Khrit, pa sang kieh pex kieh pon kham geu, riangrao khaing tang ceu ang lai koe heue. Mawh Yesux tix kaux khaing pa chix tawx riangrao pon kham pon geu, mai riangrao pa pex ka can kuceu khawmuik heue. Daux Phuk lai Sigang Khri tix dah ah nin:

📖 *Ka piang haktiex in, pex tag yaox krax kharhawm kharhi, viang mawh nan, kieh koe rhawm cong heue. Aux hoik pex ka haktiex in heue. (Yohan 16: 33)*

#### Riangrao pa pon kham geu

1. Riengrao pon kham, chix pon khaing Siyiex im ju
2. Riengrao pon kham, chix pon khaing Cao Khrit
3. Riengrao pon kham, chix pon khaing Khwan Cao
4. Riengrao pon kham, chix pon khaing gumlox Siyiex
5. Riengrao pon kham, chix pon khaing krax rawg bwan
6. Riengrao pon kham, chix pon khaing phat Phuk lai Sigang Khri
7. Riengrao pon kham, chix pon khaing kaing krub mai krax yaogyaw bwanson heue. (2 Timose 4:5)

#### ❀ 17. KAWN KHRIT MAI KRAX KWANG PLAK HAKTIEX ❀

Awm pa hoik koe daux lai pa hoik tiem ex ti deuh plak sivoie tan, kawn khrit khankix, mawh pa hoik laug Siyiex ti teei kadaux sinax pwi haktiex in heue. Plak ju plak khwan, mai plak krax yumrhawm ka Siyiex, ang lai awm kawn haktiex khankix heue. Kawn khrit hoik tang siyox khaing haktiex heue.

Kawn khrit mai kawn haktiex khankix, ang lai situ krax keud krax sawn, ang lai situ krax keud pot jun pot, ang lai situ krax yumrhawm, ang lai chix situ krax tawng krax yung, ang lai chix situ mhai dee sang hoek, ang lai situ krax lawng blawng hu, ang lai situ kaing krub mai Siyiex pa krub heue. Awm an, dee sang hoek daux ju khaix kawx ang lai situ awm paox tix heue. Viang krax im ju ex mai krax ot ex ang lai situ awm paox tix kawx, dee yam kawn im ju ex ka piang haktiex in, miex ghreung mawx angah, ex mawh pa ot greem krax kwang haktiex heue. Kawn khrit ang lai caw ti tiehthiang ka been krax kwang haktiex mai caw ti cu nghiit, hawt yuh kadaux alo Siyiex, mai daux krax moh krax rhawm heue.

Can beeh glawm pa yaox ti peeh ti klawm kuceu piang haktiex in, caw ti een ti sawn mawh beeh glawm pa tawx Siyiex ka kawn khrit mai rieb teei yuh daux pa gauxrhawm gauxrhi, sonsang lih koe min plakngai Siyiex kadaux kaing ceu ankix heue. Hoik tiem ti deuh daux Phuk lai Sigang Khri pa hoik koe awm in pa jhi ti deuh plak greem tin heue.

📖 *Kieh pwi kukaux koe krax cu krax nghiit ka Simiang pa giex kaing pa ting piang tix, grawhgrawng nawh.*

*ang koe sibrawm ti mawh Simiang, can kix pa mawh Simiang yam in kawx, mawh Siyiex pa ciak ti deuh ka kix heue. Mawh kheu nan, kaw pa lheu lox Simiang mawh pa thieh ka been pa deuh Siyiex heue. Can kix pa thieh kah, tag sang pon pa prawng pa ciyang ka tokaux tix heue. (Romax 13:1-2)*

Kawn khrit caw ti laig hu sinax pwi haktiex

Kawn khrit ang lai awm pwi haktiex pa ah nan, ang sang ah ka pa nhie kawn khrit thieh ka been haktiex in heue. Sang kieh mawh pa laig kadaux haktiex in, mai mawh pa jhi pwi haktiex yaox ka cao taoh Yesux khrit heue.

Kawn khrit caw ti mawh kawx ngu dau pa faik, caw ti mawh pa **rieng**, mai mawh **kih** pa laoh sinax kawn pwi haktiex in, sonsang yaox pwi ka krax moh Siyiex, mai ka siawpsibrawm pa ting pa lhaong Nawh Cao, mai sonsang yumrhawm pwi haktiex khawmuik ka krax taoh Yesux Khrit heue.

 *Awm an kieh pa riieng pex jhan sivoie ngai kawn pwi heue. Sonsang yaox kix kaing pa yuh pex pa mhawm, mai yaogyaw Keeing pex pa ot kadaux meung raoma (Mathiex 5:16)*

Sonsang laig hu gumlox krax taoh Yesux Khrit, kadaux haktiex kudah kudee, kawn khrit caw ti laig hu kadaux haktiex in, mai jhi ceu pa mhawm Cao Khrit ka pwi haktiex in kudah kudee heue.

1. Jhi kawn pwi yaox Cao Khrit dee yuh tix kaing jhaw, can pa yuh tix pa mhawm kuceu heue.
2. Jhi pwi yaox Cao Khrit ka been mhawm, jhawm mhawm, lox mhawm, pakpeung pa mhawm, rhawm rhi pa mhawm tix heue.
3. Jhi pwi yaox Cao Khrit ka pa lhat graung mai pa nabyam, yungyi ka Siyiex im ju heue.
4. Jhi pwi yaox Cao Khrit ka krax im ju pa singax pa mhawm heue.
5. Jhi pwi yaox Cao Khrit ka gumlox Phuk lai sigang khri heue.
6. Jhi pwi yaox Cao Khrit ka pa hoik phan hoik yuh Siyiex, pa mawh khaix taix roi caong pa yuh Siyiex khawmuik heue.
7. Jhi pwi yaox Cao Khrit ka khaoxlhak dee kham geu Nawh ti yum son phimap haktiex heue.

Viang krax im ju kawn khrit, tang tiah khaing haktiex in kawx, tokaux kawn khrit khawmuik, mawh pa caw ti laig hu sinax kawn pwi haktiex khawmuik sonsang tawng sang yaox haktiex in ka Yesux heue.

\*\*\*\*\*

## 18. NYIEXMA KAWN KHRIT

Ka piang haktiex in, pa ting ceu tix ceu mawh nyiexma heue. Kadaux nyiexma khawmuik, mawh nyiexma kawn khrit pa nie ting ceu heue. Nyiexma kawn khrit khawmuik, mawh dee pa kieh Siyiex ex yuh kaing Satsana kah heue. Ka ang nyang baox hu sivoë, ex deeh keud ti yaox grawng ceu pa koe daux Phuk lai Sigang Khri tiblax yaox ha.

✠ *Mawh kheu nyiexma Noax, pwi ceu piang haktiex in khawmuik, yaox ti koe simie ceucad, mai hoik naog ka piang haktiex kudax kudee, tom singaix heue. Nyiexma Noax lhat graung cu ngiët ka lox tawm Siyiex, pwi haktiex tom ang lai dak uik simin, khawm tosat tomiang khankix pon pa im ju kheu nyiexma Noax heue.*

✠ *Nyiexma Abram kawx awm an heue. Yam Siyiex nhie nawh hu, mai yam Siyiex mhaing nawh tan kawn simex pa koe tix khaing ka Tix, Nawh yumrhawm ka Siyiex leeing ju mai hawt yuh lox krai Siyiex kadaux pa ang doh gah greed ceeix kawx heue. Mawh kheu Abraham, pwi ceu piang haktiex pon bwanson, mai kaux cong daux krax yumrhawm heue.*

*Khaix an, nyiexma Yawsux, nyiexma Kawnelix mai nyiexma Nawmix khankix, ex yaox koe pa kaux cong krax yumrhawm kix, mai kix koe bwanson son Siyiex heue.*

- ❖ Nyiexma kawn khrit, mawh dee krub ka Siyiex heue.
- ❖ Nyiexma kawn khrit, mawh dee yuh kaing jhaw Siyiex heue.
- ❖ Nyiexma kawn khrit mawh dee priex dee rien dee khrawm sin ngao cie Siyiex heue.
- ❖ Nyiexma kawn khrit mawh dee gau gumlox Siyiex
- ❖ Nyiexma kawn khrit mawh dee taoh lih ka khwan pa laung daux phimap
- ❖ Nyiexma kawn khrit, mawh dee priex nyo sinie
- ❖ Nyiexma kawn khrit, mawh dee jhi grang meung raoma
- ❖ Nyiexma kawn khrit, mawh dee yaogyaw bwanson Siyiex
- ❖ Nyiexma kawn khrit, mawh dee yuh kaing krax moh, pa mawh kaing teem coi ka pwi, tan lu ka Siyiex
- ❖ Nyiexma kawn khrit, mawh dee sawg ti tawng alo Siyiex

Phan yuh kaing ceu pa ang mhawm ang mhiem, can pa mawh ceu kaing pa seeing brai, pa dex dawd mai phimap phigrham khankix, kadaux nyiexma kawn khrit, ang lai khaw caw ka rhawmrhi Siyiex, Nyiexma an, ang koe bwanson son Siyiex heue.

Nyiexma kawn khrit khankix, kaux cong ka daux tawm taix Siyiex heue. Kheu hoik mawh pa lih koe kheu alo Siyiex, Siyiex kwang kia ka nyiexma an ku jheeng jheeng heue. Nyiexma kawn khrit, mawh num: dee yuh kaing jhaw Siyiex heue. Mawh dee eei dee priex ka sin Siyiex son

kaing jhaw Nawh heue. Phan nyiexma kawn khrit ang koe krax lhat graung ka Siyiex, phan nyiexma kawn khrit ang koe krax moh ka paox tix, phan nyiexma kawn khrit ang koe krax khre krax rien son kaing jhaw Siyiex, nyiexma an chix koe bwanson yuh ka mawx?

Siyiex yuh kieh nyiexma lih koe ka piang haktiex in, jah ka nyiexma Adam Evax dix, Nawh Cao deuh krax keud pa kiied ting, mai sum ka nyiexma an, sonsang koe min plakngai Nawh Cao kadaux nyiexma an heue. Nyiexma kawn khrit mawh nyiexma dee kieh Siyiex ting min plakngai leeing ju heue. Yawsux hoik pao lox grawng pa kieh nyiexma tix mawh pa krub ka Siyiex ah nin,

📖 *Phan mawh aux mai kawn nyiexma aux, krub ngie ka Simiang Siyiex khaing ngie heue. (Yawsux 24:15)*

Siyiex hoik laug ti teei, mai hoik sum ti deuh ka nyiexma kawn khrit sonsang mawh dee yuh kaing jhaw Nawh heue. Phan kawn khrit tix nyiex nyiex, yuh kaing pa phit pa lud daux nyiexma, chix khaw caw mai alo Siyiex yuh ka mawx? Siyiex ang koe alo ka nyiexma inkix heue.

- ❀ Nyiexma kawn khrit ang koe pa simah simaing
- ❀ Nyiexma kawn khrit ang koe pa krub riangrao
- ❀ Nyiexma kawn khrit ang koe pa lhat ka phicaox
- ❀ Nyiexma kawn khrit ang koe pa khirhawm
- ❀ Nyiexma kawn khrit ang koe pa sa pa lao
- ❀ Nyiexma kawn khrit ang koe pa jhax pa lawg

- ❀ Nyiexma kawn khrit ang koe pa phit pa vao, mawh dee kwang pa nhim Siyiex jheeng jheeng heue.

### Nyiexma pa koe bwanson

Yesux ah nin ka kawncau mausoï Nawh ka grawng nyiexma,

📖 *Pex laig ka daux nyiex mawx angah, pex ah lox yuh nin, kieh pa nhim koe piang nyiex in liak, phan kawn praix pa nhim koe tan, pa nhim pa tawx pex tak ot piang nawh, viang mawh nan, phan ang koe, pa nhim an tag deeh ka pex heue. (Lukax 10:5)*

Nyiexma pa koe bwanson, mawh nyiexma pa chix rieb teei bwanson heue. Viang Siyiex hoik nawb bwanson ka nyiexma kawx, phan pwi kadaux nyiexma an, ang rieb teei bwanson, nyiexma an, ang chix koe bwanson heue. Nyiexma pa koe bwanson, mawh nyiexma pa rieb teei ka bwanson, mawh nyiexma pa yuh bwanson, mawh nyiexma pa sawg pon bwanson, mawh nyiexma pa simie pa lo ka bwanson heue.

Nyiexma tix lhang, phan pwi pa nhim koe kadaux nyiexma an, pa nhim chix lih hoek kadaux nyiexma an heue. Phan pwi pa nhim ang koe, pa nhim pa sang hoek ot kadaux nyiexma an, tag deeh hu ka cao pa tawx pa nhim, pa mawh Siyiex leeing ju heue.

\*\*\*\*\*

## ▲ 19. KAWN KHRIT YUH PAOXPIE TAU ▲

Dee ot dee koe kawn khrit khankix dee mawx angah, krax pa yuh paoxpier tau, mawh pa ang koe ang chix heue. Kawn khrit mawh pa yuh paoxpier tau ka daux krax moh krax rhawm Siyiex heue.

Can kawn khrit pa ot dee mawx angah, ang lai mawh pa tang tiah ot khaing paox tix, mawh pa gaux rhawm yuh paoxpier tau mai paox tix, mai rom ti yuh kaing jhaw Siyiex tau heue. Krax pa yuh kawn khrit khankix paoxpier tau, mawh kadaux krax moh Siyiex, mai daux pa singax singeh heue. Mawh kadaux pa awn pa tiem, mai kadaux pa gauxrhawm gauxrhie tau kadaux kaing jhaw Siyiex heue. Phuk lai Sigang Khri hoik tiem ti deuh ah nin, *Paw vi tik ka ceu pa krawk khrawm paox tix* ah nan daux lai (*Hebrie 10:25*) heue. Krax pa krawk khrawm ex paox tix, mawh riangrao pa ting tix ceu, son kaing jhaw Siyiex heue.

Mawh pa khaw pa caw ka rhawm Siyiex heue. Krax pa yuh kawn khrit paoxpier tau, ang koe ang chix heue. Kawn khrit ang chix tang tiah ot khaing paox tix, gauxrhawm mai yuh paoxpier tau, kadaux can kaing ceu pa khaw pa mhawm kuceu heue. Kawn khrit khankix, ang joeng mawh ngie pa yuh paoxpier ka Keeing Cao Siyiex, mai ka kawn Cao Yesux Khrit ngie khaing. Viang paox kawn khrit ex khawmuik caw ti yuh paoxpier tau mai paox tix heue. (1 Yohan 1:3)

Pwi yumrhawm krai tix hoik yuh paoxpier mai Siyiex, viang mawh nan, ang yuh paoxpier tau mai paox kawn khrit tix, pwi yuh nan kawn ca ot kadaux pa pie pa lhen heue. (1 Yohan 1:6)

Phan nawh yumrhawm ka Siyiex mawh pa rieng mai phan nawh hoik rug ot kadaux pa rieng tete telai, nawh caw ti yuh kaing pa rieng, tau mai paox kawn khrit tix, ka daux pa yuh paoxpier tau heue. (1 Yohan 1:7)

### Bwanson pa yuh paoxpier tau

1. Yuh paoxpier tau sonsang yuh kaing krub
2. Yuh paoxpier tau sonsang chix teem ka paox tix
3. Yuh paoxpier tau sonsang baox moh ka paox tix
4. Yuh paoxpier tau sonsang haokhuan kawn khrit kadaux kaing ceu pa mhawm
5. Yuh paoxpier tau sonsang koe min plakngai Siyiex kadaux cubcaw kawn khrit
6. Yuh paoxpier tau sonsang rom ti rawgbwan tau
7. Yuh paoxpier tau sonsang rom ti johjhan kaing satsana, mai kaing krai loxbwan gauxrhawm gauxrhie
8. Yuh paoxpier tau sonsang gau gumlox Siyiex tau mai paox kawn khrit tix
9. Yuh paoxpier sonsang rom ti yaogyaw Siyiex tau
10. Yuh paoxpier sonsang lailoh kham mhai sakse tau
11. Yuh paoxpier tau sonsang kum kawng grawng krax haokhwan kaing jhaw Siyiex daux bawgyam sivoeng ngai
12. Yuh paoxpier tau sonsang koe rhawm tix mu jheeng jheeng, ang gah ang greed khaing kaing jhaw Siyiex

Siyiex krax moh, simie ti kieh kawn pwi moh ka paox tix, mai ot siu, cu sioh tau, ot tix nyawm ngawm tix dah tau, yuh paoxpier tau sonsang koe min plakngai Siyiex kah heue.

\*\*\*\*\*

## 20. KAWN KHRIT YAOGYAW BWANSON

Kawn khrit piang haktiex in khawmuik, mawh pa caw ti yaogyaw bwanson Siyiex ting ting lhaong lhaong heue. Lheu khaing an, nie mawh kawn khrit khawmuik, pa lheu caw ti yaogyaw ka Siyiex ang jud ang jai, ang uik ang leeing heue.

Daux Phuk lai Sigang Khri Siyiex tiem ti deuh ah nin,

☞ *Kieh can pa im ju khawmuik, yaogyaw ka Simiang Siyiex. Halehuya (Yaogyaw 150:6)*

Pa sidaing ting ceu khaing paox tix, daux krax im ju kawn khrit khawmuik mawh pa yaogyaw bwanson Siyiex khawm rhawm khawm rhi, khawm ju khawm khwan tix tete heue. Kheu mawh alo Siyiex kadaux Yesux Khrit ka son ex heue. (1 Thesalonix 5:18)

Phan ah ti sang hu ka Siyiex, pa ting ceu son pa viex ex hoek ka Nawh Cao, (1) krax yumrhawm (2) krax een rhawm (3) krax yaogyaw bwanson (4) krax appong khawmuik (5) krax pa lhat graung mai cu nghiet inkix heue.

### Yaogyaw bwanson yuh ka mawx?

1. Lhat graung, nabyam ka ceu kaux Simiang Siyiex pa Singax Singeh mai yaogyaw bwanson
2. Appong eenrhawm ka Siyiex im ju khawmuik
3. Cungiit mai hawt yuh alo Siyiex jheeng jheeng
4. Viex rhawm rhi tix singax, viex rhawm rah see tix krub ka Siyiex
5. Kaux sijax daux krax im ju tix

6. Yuh kaing jhaw Siyiex kadaux krax moh krax rhawm
7. Moh ka Siyiex kheu nie lheu ting piang khawmuik
8. Yuh tokaux tix singax luan hu khaing phimap
9. Krai grawng pa jiet mhawm Siyiex
10. Yaogyaw ka lox rhax mai kadaux dee chix keud tix khawmuik

Can pa yuh krax yaogyaw bwanson Siyiex kukaux kupwi, caw ti koe ceu inkix khankix, phan yuh nan, tom chix kok mawh krax yaogyaw bwanson Siyiex heue.

Siyiex kieh kawn pwi im ju, kaing ting mawh sonsang yaogyaw ka bwanson khawm rhawm khawm rhi khawm ju khawm khwan tix, awm hoik tiem daux Phuk lai Sigang Khri ah nin:

☞ *Pwi pa hoik yum, mai pwi pa hoik lih ju ka dee yien dee yawg khankix, ang lai pon ti yaogyaw ka Simiang Siyiex, phan mawh ex, kawn pon ti yaogyaw ka Simiang Siyiex, jah tom yam in, tom hoek leeing ju leeing phan heue. Halehuya (Yaogyaw 115:17-18)*

### Alo Siyiex son pa yaogyaw bwanson

- ❀ Yaogyaw bwanson Siyiex ang jud ang jai
- ❀ Yaogyaw bwanson Siyiex kudah kudee
- ❀ Yaogyaw bwanson Siyiex kadaux kuceu
- ❀ Yaogyaw bwanson Siyiex kieh lheu ting khaing kuceu khawmuik
- ❀ Yaogyaw bwanson Siyiex tom sidah ju

📖 *Yaogyaw ka Nawh, mawh kheu Nawh teei siawp sibrawm mai yuh ti deuh ka ceu in khankix heue. Mai yaogyaw ka Nawh Cao, kheu mawh Nawh Cao pa kied ting kied lhaong heue. (Yaogyaw 150:2 )*

Krax blawng yaogyaw bwanson

1. Yuh kaing jhaw Siyiex, yaogyaw
2. Krai lox bwan gauhrhawm, yaogyaw
3. Yuh kaing ceu pa mhawm, yaogyaw
4. Teem coi ka pwi iak riang, yaogyaw
5. Yuh krax khan krax kheu, yaogyaw
6. Kieh koe rhawm mhawm jhawm mhawm, yaogyaw
7. Kham sakse grawng pa mhawm Siyiex, yaogyaw
8. Yuh krax tan krax lu, yaogyaw
9. Ah lai rhax, yaogyaw
10. Kham ti yuh pwi rieb cau, yaogyaw
11. Yuh siliex Siyiex, yaogyaw
12. Kaux sijax daux krax moh, yaogyaw

\*\*\*\*\*

❖ 21. KAWN KHRIT MAI GUMLOX SIYIEX ❖

Pwi tix kaux kawx ang sax yaox ka Siyiex heue. Can pwi pa yumrhawm khawmuik, mawh pa yumrhawm kheu pa mhong lox Siyiex heue. Krax yumrhawm, lih mawh kheu pa mhong heue. Viang krax pa mhong kawx, lih mawh kheu gumlox krai Siyiex heue. (Romax 10:17)

Kawn khrit pwi yumrhawm khankix, mawh pa pon ti tawng ka Siyiex, mai pa pon ti mawh kawn Siyiex kheu gumlox bwan heue. Yam jah koc gumlox, gumlox an ot mai Siyiex, gumlox an mawh Siyiex heue. Gumlox Siyiex mawh Tokaux Cao Siyiex heue. (Yohan 1:12). Krax yumrhawm mai krax tawng krax yung plak khwan kuceu, mawh pa lih koe kheu gumlox Siyiex heue. Sonsang kaux cong krax im ju kawn khrit, phan ang ih gumlox Siyiex tom khaw caw, pon ang chix tete heue. Son krax im ju kawn khrit plak khwan, gumlox Siyiex kiied mawh pa ting ceu tete, pa ang ih ang chix heue. Riengrao cie kawn khrit, ang koe daux tang ceu, koe daux gumlox tawm jhawm krai Siyiex heue.

📖 *Pa paoh tawng ka gumlox Siyiex, chix tawx pa rieng, chix lih kieh koe jhawm mhawm ka daux can pwi pa ang koe jhawm mhawm heue (Yaogyaw 119:130)*

Gumlox Siyiex ting sibrawm

- ✂ Gumlox Siyiex, kieh lih koe krax yumrhawm
- ✂ Gumlox Siyiex kieh lih koe dee een rhawm
- ✂ Gumlox Siyiex kieh lih koe dee keud pot jun pot

- ✂ Gumlox Siyiex kieh lih koe ceu pa gauxrhawm nyawm rhawm
- ✂ Gumlox Siyiex kieh lih koe pa singax singeh, mai pa rah pa see
- ✂ Gumlox Siyiex, kieh lih koe pa kaux cong mai pa fah rhawm
- ✂ Gumlox Siyiex, kieh lih koe riangrao pon kham pon geu
- ✂ Gumlox Siyiex kieh lih koe krax moh krax rhawm, mai krax chaoxrhawm chaoxrh
- ✂ Gumlox Siyiex kieh lih koe pa daox pa am
- ✂ Gumlox Siyiex kieh lih koe pa mhawm pa kaux sijax
- ✂ Gumlox Siyiex kieh lih koe pa pex, pa pon
- ✂ Gumlox Siyiex kieh lih koe ceu pa mi pa koe kuceu
- ✂ Gumlox Siyiex kieh lih koe pingnya cuyi, pa raux pa mox can ceu pa lih bleeh khaing gumlox Siyiex, kawn lheu mhawm ka son aux, khaing mau khri kaing: rheng kaing: mheen heue. (Yaoyaw 119:72)

### Sidiex gau gumlox Siyiex

- 📖 *Sidiex gumlox bwan, niied ti coca yam caw bawgyam angah yam ang caw bawgyam angah, mai plak jhi pwi yaox phimap, mai ah, mai ne, mai jeeh nyaw, mai gau ka krax pa lang gun lang yeung khawmuik heue. (2 Timose 4:2)*

Koe bawbyam, ang koe bawgyam, kawn khrit caw ti coca sidiex loxbwan, pa mawh gumlox Siyiex heue. Kheu an, mawh beeh glawm pa ting, pa tawx Siyiex ka kawn khrit heue. Daux nyiex bwan angah, daux nyiexma angah, daux pawie dee khrawm pwi paox tix tix dah dah angah, yam lawng krax, yam kum, yam fi tau mai paox grawm paox meed tix, yam hu yam ing dee mawx angah, yam mawx angah, caw ti krai gumlox Siyiex, mai sidiex gau gumlox bwan ku jheeng jheeng heue. Yam sidiex gau gumlox bwan an, pa ting ceu, mawh inkix pa jhi plak greem khankix heue.

- ☒ Sidiex gau loxbwan khaw caw daux alo Siyiex
- ☒ Sidiex gau loxbwan pa koe daux Phuk lai Sigang Khri
- ☒ Sidiex gau loxbwan ka pa appong daux Siyiex
- ☒ Sidiex gau loxbwan mai deuh Siyiex ot sivoie tix
- ☒ Sidiex gau loxbwan ka rhawm kua rhawm cong paw lhat
- ☒ Sidiex gau loxbwan mai jhi phimap ka kix
- ☒ Sidiex gau loxbwan mai jeeh nyaw ka kix daux pa lang gun lang yeung
- ☒ Sidiex gau gumlox bwan ka lox awn lox mhawm
- ☒ Sidiex gau gumlox bwan daux krax moh mai rhawm rhi pa singax singeh
- ☒ Sidiex gau gumlox Siyiex ngie, paw vi krai grawng pa kieh pwi tang kaux sideeing kah
- ☒ Sidiex gau gumlox Siyiex tau mai pa yaogyaw bwanson

## 22. CAO TEEM PA MAWH KHWAN SINGAX SINGEH

Gumlox pa tawm Yesux ka kawn cau Nawh khankix tix ceu, grawhgrawng pa dex pa dawd mai Khwan Singax Singeh Cao, hoik tiem ti deuh ah nin:

 *Viang mawh kawx nan yam hoik hoek Cao teem pa sang ploi aux hoek khaing Keeing Cao ka pex, pa mawh Khwan Cao pa mawh pa meh, pa lih hoek khaing Keeing Cao, Nawh tak sang kham mhai sakse grawhgrawng Aux. (Yohan 15:16)*

Khwan Singax Singeh Cao mawh pa ploi Yesux lih hoek khaing Keeing Cao heue. Nawh mawh Cao pa teem pa coi ka pwi yumrhawm, son kaing jhaw ceu pa mhawm, pa khaw pa caw mai alo Siyiex heue. Sonsang chix yuh kaing pa khaw pa caw alo Siyiex tix ceu ceu, phan Khwan Singax Singeh Cao ang thung gau ka ex, phan Khwan Singax Singeh Cao ang teem coi ka ex, ang chix pon yuh kaing ceu ankix heue. Pa tawx satix ka ex, pa kieh pwi chix gwieh ti tawng ka ceu pa mhawm mai ceu pa ang mhawm, mawh Khwan Singax Singeh Cao heue.

Viang mawh gumlox Siyiex pa singax singeh kawx, phan rien ti mawh pa nai pa nawk kheu pa yuh kawn pwi pa caox khankix, Khwan Cao tiebtie ka son ang sang yuh sang hu heue. (Kawncau 16:6)

Khaix hoik tawm Yesux lox ka kawncan mau soi Nawh khankix, Nawh hoik kadaux meung raoma, mai ploi Khwan Singax Singeh Cao hoek ka piang kix heue. Yam pon kix

Khwan Singax Singeh, kix hu ti kham sakse heue. Awm an, yam mawx kawx angah, phan Khwan Singax Singeh ang thung gau teem coi ka ex, ex pwi yumrhawm, ang tau ti chix pon yuh kaing ceu pa mhawm tix ceu kawx heue. Kaing jhaw Siyiex mai gumlox Siyiex, khawm can ceu pa mhawm khawmuik, mawh pa kaoh khaing Siyiex, mai mawh pa thung gau teem coi Khwan Singax Singeh Cao ka ex heue.

Phan Khwan Singax Singeh Cao ang kwang kia teem coi ka ex, kaing pa yuh kawn khrit kuceu, ang koe bwanson tittix heue. Can kaing pa yuh ex kaing jhaw Siyiex khawmuik khawm leeing, mawh pa thung gau teem coi Khwan Singax Singeh Cao ka ex heue. Khwan Singax Singeh Cao mawh Cao pa thung gau, mawh Cao jhi daux krax, mawh Cao teem coi, mawh Cao priex pau, mawh Cao tawx bwanson, mawh Cao kwang kia, mawh Cao thiiienthie riangrao pa lo ex plak khwan ku jheeng jheeng heue.

Can ex kawn khrit ot dee mawx angah, kaux mawx angah, yumrhawm grawng Khwan Singax Singeh Cao liemlia kia ngiien, ot dex ngawm dia tau mai ex ang jud ang jai heue. Kawn Khrit caw ti een rhawm, rawg bwan, sonsang chix hawt hu ex khaix pa thung bung Khwan Cao ka ex kubawg kuyam ku jheeng jheeng heue.

Phan ex im kheu Khwan Cao viang pa hu ex kawx. kieh mawh daux Khwan Cao heue. Paw kieh ex lih ti mawh pa sawg min plakngai pa giex pa going, paw choeng ka paox tix, mai paw ghoeing ka paox tix heue. (Kalatix 5:25-26)

Kaing yuh Khwan Singax Singeh Cao

- † Khwan Cao mawh Cao teem ka ex
- † Khwan Cao mawh Cao gau Cao thong
- † Khwan Cao tawx satix ka kawn khrit
- † Khwan Cao liemlia kia ngiien ka ex
- † Khwan Cao jhak ka ex jheeng jheeng
- † Khwan Cao jeeh nyaw pwi daux pa mhawm
- † Khwan Cao jhi ex yaox daux krax Siyiex
- † Khwan Cao tiebtie pa caox ka son ex
- † Khwan Cao tawx riang yam iak riang
- † Khwan Cao kieh ex nyawm ot nyawm rhawm
- † Khwan Cao kieh ex kaux cong
- † Khwan Cao kieh ex koe pa nhim
- † Khwan Cao gwieh ex yaox pa caox mai pa mhawm
- † Khwan Cao so rhawmrhi khwan ju kawn pwi son kaing ceu pa mhawm

Plix Khwan Cao

Plix Khwan Cao mawh pa kiied ting ceu ka son kawn khrit heue. Mawh pa ang koe ang chix heue. Kawn khrit mawh pa hoik keh kadaux Khwan, mai mawh pa im ju daux pa thong gau Khwan Cao heue. Riengrao kawn khrit mai krax im ju kawn khrit khawmuik, mawh pa teem coi Khwan Cao ka son ex heue. Phan ang mawh kheu Khwan Cao kawn khrit sang chix yuh kaing pa ting pa mhawm yuh ka mawx? Phan ang mawh Khwan Cao, pa koe kadaux kawn khrit,

kawn khrit ang chix plix, plix khwan tix ceu kawx, pwi mawx angah pa ang plix, plix Khwan Cao kheu Khwan Cao ang koe daux nawh heue. Phan Khwan Cao ang plix plix daux kawn khrit, sang chix kieh pwi tawng grawng mawh tix kawn khrit yuh ka mawx? Phan ang koe plix Khwan Cao, chix koe pa tang siyox khaing haktiex yuh ka mawx? Daux phuk lai sigang khri hoik tiem ti deuh grawng plix Khwan Cao awm in plak greem heue. Plix cie Khwan Cao mawh:-

- (1) Pa moh pa rhawm
- (2) Pa gauhrhawm gauhrhi
- (3) Pa nhim
- (4) Pa lang gun lang yeung
- (5) Pa chix chaoxrhawm
- (6) Pa mhawm pa mhiem
- (7) Pa kaux sijax
- (8) Pa awn rhawm awn rhi
- (9) Pa chix priex rhawm tix

Ceu inkix sidim mu heue.

Khwan Cao teem ka pwi sonsang chix plix plix Khwan

Phan Kwan Cao ang koe kadaux kawn khrit, kawn khrit kawx ang chix plix plix khwan, phan plix khwan ang plix kadaux kawn khrit, krax im ju kawn khrit ang koe deebleeh, mai ang koe bwanson, phan krax im ju kawn khrit ang koe deebleeh mai ang koe bwanson, kawn khrit ang chix tang siyox khaing haktiex, phan kawn khrit ang lai tang siyox khaing haktiex, ceu pa laug Siyiex ti teei ka kawn khrit mai pa ciak

Siyiex ti deuh ka kawn khrit sinax pwi haktiex in ang koe bwanson tittix heue. Phan krai tete telai, Siyiex laug ti teei ka kawn khrit ka piang haktiex in, mawh sonsang plix plix khwan heue.

Plix Khwan Cao mawh pa kiied ting ceu sonsang grum naog alo Siyiex ka piang haktiex in heue. Phan kawn khrit ang plix plix khwan, pwi haktiex ang lai chix yaox ka pa mhawm Siyiex kheu kawn khrit khankix heue.

### Plix Khwan (9) mu

#### (1) Plix Khwan krax moh krax rhawm

- krax moh krax rhawm chix pluut phimap
- krax moh krax rhawm chix teem ka pwi
- Krax moh krax rhawm chix via singai khaing pa seeing pa brai
- krax moh krax rhawm chix keud ti yuh ceu pa mhawm kuceu

#### (2) Pa gauxrhawm gauxrhi

- pa gauxrhawm gauxrhi, chix kieh koe krax nyawmrhawm nyawmrhi
- pa gauxrhawm, chix kieh koe pa haokhuan
- pa gauxrhawm, chix kieh koe kaux cong
- pa gauxrhawm, chix kieh koe pa mawh rhawm tix mu

#### (3) Pa nhim

- pa nhim, chix koe pa nyawm ot nyawm koe
- pa nhim, chix kieh koe pa yienyawg
- pa nhim, chix kieh koe haokhuan kaux cong

#### (4) Pa lang gun lang yeung

- pa lang gun lang yeung, ang koe simah simaing
- chix koe pa nhim pa yienyawg
- chix koe pa gauxrhawm gauxrhi

#### (5) Pa chix chaoxrhawm

- pa chix chaoxrhawm, chix kieh lih koe pa kub pa koe
- pa chix chaoxrhawm, chix kieh koe pa fahrhawm
- pa chix chaoxrhawm, chix kieh koe pa grum rhawm

#### (6) Pa mhawm pa mhiem

- pa mhawm pa mhiem, mawh pa khaw pa caw
- pa mhawm pa mhiem, sawg ti yuh pa rah pa see
- pa mhawm pa mhiem, krai lox mhawm viex jhawm mhawm, keud ceu pa mhawm

#### (7) Pa kaux sijax

- pa kaux sijax, chix kieh koe pa kaux cong
- chix kieh koe pa haokhuan
- chix kieh koe pa khaw caw
- chix kieh pa mhawm pa singax

#### (8) Pa awn rhawm awn rhi

- pa awn rhawm awn rhi, chix kieh koe pa nhim
- chix kieh koe pa yienyawg
- chix kieh koe pa singax singeh
- chix kieh koe pa ting pa lhaong

#### (9) Pa chix priex rhawm tix

- pa chix priex rhawm, ang koe pa phit pa lud
- pa chix priex rhawm ang koe simah simaing

- pa chix priex rhawm ang koe ciyang pa prawn
- pa chix priex rhawm tix- chix yuh alo Siyiex
- pa chix priex rhawm tix, chix kiek Siyiex koe min  
plakngai kah heue.

Plix Khwan Cao (9) mu in, mawh pa mhawm pa ting  
khaing kuceu ka piang haktiex in heue. Viang koe tang ceu  
kawx, phan ang koe plix Khwan Cao kadaux nawh, ang  
chix koe ngawh jum, mai ang koe ngai jiang daux krax im  
ju nawh heue. Kadaux krax im ju kawm pwi khawmuik yuh  
kaing ceu pa yuh ka mawx angah, phan ang koe plix Khwan  
Cao, ang chix mawh kaing pa khaw pa mhawm plak sivo  
ngai Siyiex heue.

